

襄垣縣志卷六

學校表 甲編

學校之制詳於周而備於漢明清因唐宋舊制尙詞章重科舉英雄入彀由來者遠民國初元刷新學制而吾襄籌款設學之風亦蒸蒸日上然前代遺規與新更學制均不可略因分甲乙二編甲編取舊志之所有者乙編採新制之應列者庶界限分明新舊遞嬗之故得以見而人才發育之期將日盛云

文廟

文廟在縣治東南一百五十步金天會間知縣韓俊創建元成宗二年知縣傅仲禮重建何灝董之延祐二年知縣郭從敬建東西廡五年知縣何巨濟建戟門櫺星門至順元年知縣楊綱重修明洪武三年知縣李文於櫺星門置更衣廳二所成化二年知縣柳豸增修四年周令增正殿左右二門泮宮左右二門外石鼓石獅正德間知縣張鵬翰始置學田嘉靖二十年知縣賈希顏改更衣所為名宦鄉賢祠四十一年知縣蕭守身因廟學俱隘展修未竣嗣令李貴和繼其緒郝良臣記萬歷間知縣張嘉福武可則繼修清順治十四年知縣鄭僑重修康熙五十三年知縣柳國勳重修

大成殿五間

襄垣縣志

卷之六 學校表甲編

德配天地坊

在櫺星門東

道冠古今坊

在櫺星門西

坊兩旁有下馬碑

崇聖祠三間在大成殿後雍正三年知縣李錫桓捐修

尊經閣二層俱三間臺高二丈五尺在崇聖祠後乾隆三十三年重修

至聖先師漢平帝稱先尼公和帝封褒尊侯北魏孝文帝稱文聖宣父後周宣帝封鄒國公隋文帝稱宣師尼父唐高宗贈太師元宗謚文宣王宋眞宗謚元聖又改至聖元武宗號大成至聖文宣王明嘉靖九年更號曰至聖先師孔子始製木主清朝因之康熙二十三年御製萬世師表匾康熙二十八年御製至聖先師孔子贊並序碑雍正三年平定青海告成大學碑雍正七年生民未有匾乾隆三年與天地參匾嘉慶五年聖集大成匾道光元年聖協時中匾咸豐元年德齊幃載匾同治三年神聖天縱匾俱在達天德門內外懸掛

配享位次

四子配享自元豐咸淳始也坐廟中兩楹間十哲升配自開元始也坐廟中兩壁間兩廡從祀亦自開元始清代升有子於卜子之下升朱子於顓孫子之下至於從祀位次遵照乾隆六年部頒東西兩廡先賢先儒神牌位次定列今悉遵同治三年部頒位次改設並添設續增從祀先儒位次備列於後

四配

復聖顏子

宗聖曾子

述聖子思 亞聖孟子

十二哲

閔子 冉子耕

冉子 宰子

端木子 冉子求

仲子 言子

卜子 顓孫子

有子 朱子

東廡先賢

公孫僑 林放 原憲

司馬耕 梁鱸 冉孺 南宮适 商瞿 漆雕開

漆雕哆 公西赤 任不齊 伯虔 冉季 漆雕徙父

罕父黑 榮旂 左人郢 鄭國 原亢 鄔單

叔仲會 公西輿如 邽巽 陳亢 琴張 步叔乘

秦非 顏噲 顏何 縣宣 牧皮 樂正克

襄垣縣志

卷之六 學校表甲編

二

萬章 周敦頤 程顥 邵雍

西廡先賢

蘧瑗 澹臺滅明 宓不齊 公冶長 公皙哀 高柴

樊須 商澤 巫馬施 顏辛 曹卹 公孫龍

秦商 顏高 壤駟赤 石作蜀 公夏首 后處

奚容蒧 顏祖 句井疆 秦祖 縣成 公祖句茲

燕伋 樂欬 狄黑 孔忠 公西蒧 顏之僕

施之常 申振 左邱明 秦冉 公明儀 公都子

公孫丑 張載 程頤

東廡先賢

公羊高 伏勝 毛亨 孔安國 后蒼 許慎
光緒元年從祀

鄭玄 范甯 陸贄 范仲淹 歐陽修 司馬光

謝良佐 羅從彥 李綱 張栻 陸九淵 陳淳

眞德秀 何基 文天祥 趙復 金履祥 陳澧

方孝孺 薛瑄 胡居仁 羅欽順 呂柟 劉宗周

孫奇逢	張履祥	劉因	陸隴其	張伯行	趙岐
西廡先儒					
穀梁赤	高堂生	董仲舒	劉德 <small>光緒二年從祀</small>		毛萇
杜子春	諸葛亮	王通	韓愈	胡瑗	韓琦
楊時	游酢 <small>光緒十八年從祀</small>		尹焞	胡安國	李侗
呂祖謙	袁燮 <small>同治七年從祀</small>		黃幹	蔡沈	魏了翁
王柏	許衡	吳澄	許謙	陳獻章	蔡清
王守仁	黃道周	陸世儀	呂大臨	湯斌	輔廣 <small>光緒六年從祀</small>
陸秀夫	曹端	呂坤	顧炎武	王夫之	黃宗羲

崇聖祠配位增祀

先賢孔氏孟皮爲五配位咸豐七年河南學政愈樾奏准祀入東配

孔氏五代廟

聖母稱王自唐開元始宋大中祥符元年加謚昭烈稱啟聖公自元始也宋時顏曾子思配享堂上顏路曾皙伯魚從祀兩廡洪邁姚燧以爲崇子抑父熊禾謂宜別設一室祀聖父而以三子配程敏政主其說嘉靖九年遂專祀徧天下尋升激公宜於三子爲四配又以周輔成程珦朱松蔡元定爲四從

清雍正三年稱崇聖祠以先儒張迪坵祀並周程朱蔡爲五從位

先賢顏氏

諱無繇字路顏子同之父

先賢曾氏

諱點字子皙曾子參之父

先賢孔氏

諱鯉字伯魚子思子伋之父

先賢孟孫氏

激公宜孟子軻之父

先儒周輔成

字伯大周子敦頤之父

先儒張迪

張子載之父

先儒程珦

字伯溫二程顥之父

先儒朱松

字喬年朱子熹之父

先儒蔡元定

字季通蔡子沈之父

孔氏五代廟位次圖

	昌聖王伯夏公之位 裕聖王祈父公之位 肇聖王木金父公之位 詒聖王防叔公之位 啟聖王叔梁公之位	
先儒蔡氏 先儒程氏 先儒周氏 先賢孔氏 先賢顏氏	先賢曾氏 先賢孟孫氏 先儒張氏 先儒朱氏	

文昌祠在文廟東南隅正殿三間西廳三間大門一座特房一間在門左鐘房一間在門右乾隆三十三年重修每年二月初三日聖誕邑紳士捐祭有碑記

魁星樓在南城上樓東乾隆四十一年重修

名宦祠三間在泮池東
位次

金

本縣知縣僑 宸

韓 俊

明

本縣知縣張 曉

甯 智

劉 瓚

劉 明

賈希顏

蕭守身

清

提督山西太原等處都察院右副都御史申朝紀

本縣知縣于嗣昌

鄉賢祠三間在泮池西

位次

春秋

義士 豫讓

魏

孝子 楊引

元

中書左丞楊仁風 義士 張佩

沂州同知張碧 集賢院學士連肇

明

推官 王擴 監察御史 連楹

都御史 李濬

監督御史 劉端 吏部尚書 劉潔

吏部尚書 劉鳳儀

太子少保 劉龍 鄂縣知縣 崔仲和

束鹿知縣 王俊臣

節孝祠三間 在儒學門左

忠義祠三間 在儒學門右

明倫堂

襄垣縣志

卷之六 學校表甲編

五

明倫堂為甄陶人才之地康熙年教諭母儀重修歲久傾圮乾隆三十四年邑紳士捐貲重修明倫堂五楹併大門二門友善齋三間進德齋三間

學署

教諭宅 在明倫堂後

訓導宅 在明倫堂西

弟子員

漢初弟子私相傳授武帝始建學置弟子員唐制上縣四十人中縣三十五人宋無定員崇甯三年以費廣難贍照現在生三分汰一元有大學生小學生樂生明洪武初令縣學二十人給廩膳宣德三年增廣生如廩膳之數正統十二年於常額之外選軍民子弟願入學者每生優免二丁充坊學生清順治四年稽查原數現存甚少廣收人才以示朝廷恩意十三年又因數額太廣奉旨汰革大縣每錄止四十人中縣二十五人下縣十二人十五年奉旨裁革定額襄垣中縣止十二人康熙元年革帖括用策論取士三年中科歲試並為一考大縣取四人中縣三人下縣二人康熙己酉年酌復舊章仍用八股試士中縣取十人後又增二人襄垣中學定科歲試文武各進十二人

賜書

聖諭廣訓

性理精義

周易折衷

聖諭廣訓直講

朱子全書

詩經傳說

上諭二部

四書解義

書經傳說

御製訓飭士子文

康熙字典

春秋傳說

三朝寶訓

四書文

十三經

二十一史

明史

學政全書

樂善堂全集

駁呂留良講義

科場條例

欽定鄉會墨

無

三禮義疏

續增科場條例

周易述義

詩義折衷

春秋直解

斯文精萃

學規

宋大觀元年詔布周官八行八刑之法於學宮令所在鐫刻淳祐六年御書白鹿教條頒行天下學宮立石明洪武二年令學者專治一經以禮樂射御書數設科以分三教年定學校射儀十五年頒禁例於天下學校勒石於明倫堂左謂之臥碑清朝順治九年御製條約共計八條刻石學宮謂新臥碑今在明倫堂康熙九年十月初九日頒上諭十六條通行曉諭每月朔望縣正傳官紳紛耆老軍民人等宣講聖諭使教化行而風俗美康熙四十一年頒御製訓飭士子文鐫碑樹立明倫堂之左以便士子誦習

襄垣縣志

卷之六 學校表

六

學田

明正德十二年知事張鵬翰設釋菜田三頃七十四畝 誌石在明倫堂

原設學田

劉家庄地四十四畝

今名小黃庄其地東抵付周西抵郝永習界南抵頂光北抵官道

下凹地四畝

在城南張家庄其地東抵孟仁界西抵馬志良界南抵官道北抵李忠界

上王里高家脚地四十畝

今名北偏橋其地東抵堵西抵趙青界南抵溝北抵官道

李窪地一頃八十畝

大脚地十畝其地東抵官道西抵溝南北抵姜苗二姓界又地十二畝其地東抵官道西抵溝南抵堵北抵崔德明界又地三畝東抵官道西抵路天保界南抵張中顯界北抵武三軒界又地六畝東西抵官道南抵李宏

昌界北抵姜振堯界老龍腰地六畝東抵官道西抵苗興國界南抵堰北抵姜廷玉界又地二畝東抵溝西南抵武興發界北抵黃文煥界又地八畝東西抵官道南北抵堰道東嶺地二十畝東抵官道西抵溝南北抵堰胡老墳地十畝東抵官道西抵頂畛南北抵苗姓界庄頭地十四畝東抵官道西南北抵堵小道地五畝東抵溝西抵官道南北抵堰郝家壩地四畝東西抵溝南抵張宏德界北抵李順唐界南岸地二畝東西北抵溝南抵李佑唐界西地十二畝東西抵官道南抵姜國成界北抵李永唐界燒土壩寨壩兩處地共三畝驢臉坡地六畝東抵官道西抵堵南抵李存唐界北抵姜富成界馬五寨地三畝東西北抵溝南抵姜富成界道東嶺地十六畝東抵官道西抵堵南抵姜富成界北抵苗興國界乾草壩地三十八畝東西抵溝南抵堵北抵水心以上二十處地俱統李村里內合共一頃八十畝

城南三角地三十畝

因拓 文廟基址變易與賈鄉宦為業

北關神堂壩地四畝

上下四段

桑林地四畝遺失

關家塢地六十八畝今存四十二畝其餘二十六畝遺失

以上八處地除變易遺失六十畝外今現存地三頃一十四畝

新增學田

龍王堂地二頃四十畝

張家庄地四畝

演武廳前地八畝

南李信地四畝

新舊地每年收租存學以為輸糧釋菜分給廩生貧士之費

書院

漳川書院道光二十七年知縣卓熙泰建修前立考棚東西各十三間大堂講堂前後左右數院房屋數十餘間規模甚為宏敞立有碑記

古韓義學舊係古韓書院前志甚詳咸豐十年知縣事孫福清改為古韓義學置買田地延師教讀貧家子弟不具束修立有碑記

建修古韓書院記

邑人趙復元

襄垣縣志

卷之六 學校表

七

考縣志明成化間有三原張公韓曉者以名進士來宰是邑政教有方曾於至聖廟左帝君祠後立書舍十六楹爾時人才傑出科第連茹稱極盛焉張公載在名宦不朽幾二百年後此接踵無人書舍頽廢有心者共嘆振興為難再矣乾隆壬申賢侯李公由選拔初任廣西二尹俸陞是邑庖刀久善製錦素工清慎勤三字兼而有之善政善教未易枚舉而尤以建立書院為惓惓仍於舊址北立講堂三楹西北寢室二楹南建對亭三楹東建書齋十二楹廚房二楹巽地大門一座院分上下下院直而長上院方而正西牆覺門一楹進通聖廟明以示士子當外脫市井之氣入登禮義之堂漸而積之以窺聖人之美富乃為學之準的也經始於甲戌之夏落成於乙亥之秋其中華棖彩楠丹艷陸離賢侯親題古韓書院更恩垂之悠久爰自捐俸倡邑中素封義士各解囊囊共得母錢若干交當行歲取子錢若干以為修金膏火之資丙子歲即延名師嚴訓諸生重文藝尤重品行復每月命題親試評定甲乙獎勵不倦而侯謂非並藉是以博取功名也蓋深望居其地習其業者忠信以厚基址廉恥以固垣牆詩書以闢戶牖經濟以潤彫施庶幾他日出仕必有一二實政貽留地方不負吾心斯不負吾職永為盛世增一培養人才之藪焉是則賢侯之志也夫侯諱體中字達用號硯齋貴州南籠人

古韓書院

陳于廷

襄垣之學名古韓羣山環繞如巒岿黃岩紫岩相對峙龍洞仙洞交榮蟠形勝光鈇射斗牛况近文廟肅瞻觀美富高標時在望希賢希聖實不難昔人曾興六豪會白紵紅綫已飛翰賴有循良繼其盛

時鶴明府

亭李任事滿院栽培盡芝蘭武陽治行張允濟平陽化俗趙尚寬信是地靈徵人傑應知大木歸神刊我來濫席參邑乘西臆剪燭興未闌長頭問事靡朝夕深愧理窟費研鑽諸生自立頗不俗發軔平步青雲端科入

郝秉仁趙宜時

李枝茂米信成

古韓書院記

張力卓

邑有古韓書院可詫也括地志同州韓城縣南十八里韓原古韓國地詩大雅韓奕箋韓姬姓國殆富辰所稱武之穆歟後滅於晉爲曲沃桓叔之子萬食邑及三家分晉韓又爲國則非韓原之韓矣今潞安府昔潞州本黎國紂時助虐武王戡之既克殷以封堯裔東與衛隣迨迫逐於狄衛弗救卹式微旄邱所由作也晉滅赤狄潞子地盡屬焉戰國初爲韓別都信陵君勸魏王存韓猶謂通韓上黨於共甯顧以近趙遠韓卒并於趙隋改韓州領上黨長子壺關襄垣銅鞮屯留潞城武鄉黎城涉十縣是襄垣隸韓州非韓州即襄垣也惟唐武德元年以襄垣黎城涉銅鞮武鄉置韓州貞觀十七年州廢屬上黨郡此縣號韓州所本第由今溯周溯隋唐時皆以古渾曰古韓得不令人悶瞽乎成周之際學校大備秦愚黔首掃蕩無餘漢至武帝始用儒術歷觀晉情唐莫能盡復古制書院濫觴五季宋則嵩陽睢陽嶽麓白鹿最著蓋儒先就山林間曠講業授徒而時君分官書命祿秩錫匾榜以寵之與學校并行者也聖朝文教昌明遠軼前代書院大者驛送經籍俾多士讀未見書主講有成效恒邀奏叙凡省會郡邑靡然嚮風鮮不鳩財勸建規模固未可概淪也今屋僅數椽書無一部直義學耳何書院之有况終歲所入百餘金不能具修脯

延山長遂爲遙領者取去以致房舍坍塌鞠爲茂草原夫初設之意詎以資遊客哉道光四年春亟修葺以居生童按租息以給膏火余亦不揣蕪陋與學師分任課程其內門通文廟顏曰依文蓋若合學校而一之焉茲將舊有貲產暨續置書籍地畝注册擇紳士經理之俟有力者恢廓而記其說如此

勸修書院考棚碑記

嘗考三代之制祇立學校而已無所謂書院也周末學校廢弛有志於學者多自相授受故孔子與七十子講學於洙泗以維持世教此實書院之權輿也自漢迄唐以雜途詞章取士學校之政益壞宋代濂洛關閩諸儒復緒鄒魯之微言聚徒講道鵝湖鹿洞始有書院之名後世遂遞相沿襲故忠孝節義之士多出乎其中我朝菁莪造士棫樸作人自首善之區以達遐陬之域無不建立書院誠以培植人材敦崇風化莫重於是也襄邑古韓書院由來以久第湫隘囂塵不可以居大非管子所云處士就燕閒之義邑中之缺事惟此爲甚余忝任茲土屢欲更張因念工程浩大兼之擇地爲艱是故因循三年未遑置議丁未之春謀於紳士購得縣治東偏李姓郝姓崔姓地基各一段鼎建書院綽乎有餘並可以建立攷棚安設坐號隨即派緣簽題闔邑踴躍更始於是年三月念日至戊申四月而落成共支去制錢五千五百餘貫自映壁以迄後牆築室一連六進內立講堂書舍考棚坐號神座厨房均齊完備董其事者屢皆綜理微密故閱年而工竣自是而後談經有舍試士有所可以免燥濕寒暑之虞可無煩搬椅運几之苦不可謂非盛舉也夫爽塏更而氣運有日開之勢絃誦適而人文呈炳蔚之觀堂構維新既一勞而永逸斯濯磨

恐後自騰實而蜚聲將見處爲名士出爲名臣固足以爲一邑之光道宗孔孟理闡程朱並足以建千秋之業皆於是舉卜之矣獨是莫爲之後雖盛弗傳茲規模已立一切善後事宜後之人有能潤澤而整頓之者是余之所厚望也夫是爲記

登雲會記

上黨太守金昀善

士習與民風相爲表裏明教化崇禮讓知詩書之可貴無錐刀之是競其風俗之美與抑學道愛人賢司牧有以振興而利導之耳路之民素稱淳樸其地風高早寒田不再熟又闕水利雨不時至歲即不登故稱瘠土其民或懋遷於外以贍其家亦不能如他郡之饒裕自餘皆務耕讀節嗇勤苦鮮惰民而士遇鄉闈亦輒以資斧不繼爲之裹足寒牕燈火每相率而有怠心加以癸丑粵匪西竄居民驚擾邇來應試亦復寥寥然則培養元氣鼓舞士風非今日之急務與嘉善孫君稼亭以名孝廉來宰襄垣其爲人恂恂儒雅一以寬厚拊循爲治邑之人樂其化奉其教爲政三年百廢具舉上官嘉其能今太守鈴公每爲余稱道不去口戊午歲分校省闈歸而見襄之赴試者少也率以貧故亟謀所以飲助之乃有登雲會之舉余惟作吏者視官如傳舍不肯爲地方久遠之謀而孫君盡心民事加意士林捐廉一倡紳商士庶踴躍同心共成義舉得錢若干緡存典生息設立章程擇公正殷實紳士典司其事孫君猶以事方圖始集腋無多推廣擴充候諸異日余謂是舉也非惟培植士氣抑亦好義興仁俗敦禮讓之驗也在昔叔簡呂先生嘗宰是邑矣其一言一行至今奉爲官書治譜雖在襄未久遺愛猶可想見然政尙嚴明故事無不舉今

孫君獨和易近情而凡邑所當爲者無不從容就理蓋讀書皆以致用寬猛殊而盡心一也抑士者鄉之秀民也識必超於鄉行必式乎鄉以此日之科名卜他年之建樹邦家之光卽閭里之榮此則賢宰與邦人屬望無窮之意吾知有志之士相與敦品勵學行見科名接踵并思所以重科名者余方拭目望之矣余罷郡爲寓公當事延主上黨書院樂其土風之美而見孫君弦歌之化洵乎愛人且易使也是爲記

登雲會碑記

邑侯 孫福清

子輿氏有言無恒產而有恒心者惟士爲能如范文正齏粥蕭寺當其作秀才時便以天下爲己任所謂憂道不憂貧者非耶然古者鄉舉里選考其制在鄉學則由鄉大夫升之司徒在國學則由大樂正升之司馬皆考其德行道藝而實興之其資遣之制不可得聞而要以賓禮禮之則優崇可知矣漢世徵明當世之務習先聖之術者令與計吏偕縣次續食惟其擇之也精亦待之也厚厥後一變而爲詞章之學再變而爲科舉之學應舉者得自投名古意寢微焉然士之誦習先王求志達道者固卓卓世有傳人焉我朝文教振興士皆萃之於學校優者給以廩餼復設立書院予以膏火貲旣教養備至矣而鄉會試道里之需貧士往往難之則大吏與司牧者類能謀之鄉之士大夫資其行李其猶賓興計偕之遺意歟顧良法美意名省皆有而彈丸小邑未必盡能仿行余自丙辰秋來宰古韓案牘餘閒樂與邑人士以文學相切劘今年特開恩榜而諸生之赴試者十不得二三豈士之不力學歟亦爲貧所累也夫三年攻苦毛羽將豐而困於斧資自戢其翼非惟志士驚心抑亦長吏汗顏邦人愧色爾爰捐俸倡始闔邑紳商同心欽

助得錢若干縉存典生息名之曰登雲會自是春關秋賦不無少助春糧庶士之奮於功名者聞風興起乎所願多士首敦品行次務通經次工文藝於以踐巍科躋臚仕文章政事莫不基於恆心而是舉也事有類於恒產並行不悖且相濟以有成也惟事方圖始集腋無多推廣擴充俟諸異日至邦人之爲是舉也邦人之好義也余既望諸生篤志勵學以無負其鄉而尤願典司其事者持以有恒毋令貪人得以浸漁酌章程之盡善俾永遠以遵行則後之來者必與余有同心焉邑紳趙君廷芝李君啓鵬實終始襄事厥功甚偉因並著之而別疏捐貲姓氏及條約如左

古韓書院義學碑記

孫福清

古者家有塾黨有庠術有序卽義學所由仿也襄邑自明成化間三原王公以名進士來宰是邦特於文昌祠後創建書舍十六楹爾時賢才輩出科第蟬聯人文稱極盛焉清乾隆年間李君體中葺而新之始稱古韓書院繼此王公元楫亦曾加意增修道光四年張君力卓重爲整治而顏曰依文且謂屋僅數椽書無一部直義學耳何書院之有今其碑誌猶存壁間卓君熙泰治襄多善政因其湫隘近市別創漳川書院以居生童而此遂廢爲文昌後院余於咸豐丙辰秋承乏茲土樂其民之儉樸而俗之淳良也公暇論文與邦人士互相砥礪惜其穎悟者少科名亦漸式微此固風氣使然抑亦子弟輩無良師以啟發之也爰卽書院舊居唱爲義學延經明行修之士設教其中每年捐廉八十餘千以供修脯凡邑之有志嚮學而無力從師者皆得入而肄業焉數載以來頗彰成效余每至義學讀壁間碑未嘗不嘆張君之言早

爲之兆也惟念捐廉設學好事者爲之耳安保其久而不廢因爲籌款購置良田二百三十八畝有奇每歲膳修卽取給於租穀庶幾垂諸久遠永無廢墜之虞乎然而儉歲旣病於歉收豐年又傷於穀賤苟不寬爲籌畫恐舌耕者裹足不前適有存典生息銀五百兩擬歸漳川書院因割息銀二十兩以畀之夫書院與義學均爲造就人材之所固相輔而行者也况今日之義學卽昔年之書院也書院經四百餘年始得卓侯擴而充之余又爲延師以董勸之區區義學安知不復有卓侯其人者從而張大之乎是則余之爲此不過造其端耳同年韓君紹休邑名孝廉也爲義學師有年矣聞余之奉諱將歸也囑爲記其緣起刻諸石以告後人云

添給書院膏火記

署縣程汝濤

竊觀邳治之世作養人材未有不自學校興起者余來攝襄篆見斯邑書院修整問爲前知縣事卓黼侯司馬所建規模宏敞至今課試賴之而經費無多不敷士子膏火故肄業者仍復寥寥中心欲經營之值年歲未豐民情拮据余旣無廉可捐費又鉅資難集今及期年余將受代矣籌之無術心滋愧焉適當余初度之辰知鹽當兩行每遇縣官生日必演戲宴會各送規禮四五十千一年兩度則每行費近百千與其以無謂之禮致幣帛之虛糜曷若以有用之財作地方之至計商之紳商將此項捐作書院膏火每年鹽當各出錢百千交監院經理添給應課生童以助薪膳官之壽禮永遠裁革所謂予不傷惠取不傷廉者庶幾近之紳商僉以爲可並乞示以垂久遠余思後之宰斯邑者培植士子必有同心當不以此舉爲

過也故記而予之泐石以告來者

合章村義學記

邑令 車 碩

合章村義學者解氏之先所建大士堂也堂有地三十畝住持不得其人地且蕪賦愈多將爲解氏累解氏有希堯者其言曰佛可奉也何必僧佛法與儒理果無二也僧以曇花貝葉居之吾以春誦夏絃居之可也請因其堂立義學即以族人主之納賦外以香火爲膏火族衆稱便里中好善者更捐金助而請記於余余惟是堂之設所謂福田利益也而幾以貽累因是變通其間不惟諸累悉除且使一鄉子弟駸駸嚮學焉福不可知而善在人爲天下事倚伏無常大抵如斯若解氏者可不謂善成先志者歟聞之古者家有塾黨有庠術有序今之義學卽此意也後世梵宇洞宮遍天下而願學之士甕牖蓬樞不蔽風雨此事理之甚不可解者西方有聖人當亦諦觀而不樂解氏乃能若此慈航中且低眉稱善矣且夫法戒莊嚴馳心易歛禪門寂曆虛境生明古之大儒當其閉戶修業往往藉以托迹非無取也若是天下之梵宇洞宮悉爲儒者講學之所其緇流黃冠之福田利益悉爲子弟膏火之資因以大衆之供養大知識者敦請老師宿儒可爲坊表者先率而訓迪之凡好善之長者不以黃金布地而爲斷齏畫粥者資其勤苦其從事於學者又皆以十年面壁之功爲十年讀書養氣之用則正學何患其不昌明而人材何患其不輩出哉解氏蓋一鄉之善人也有能若次天下人心之競趨於學卽一隅可驗焉余承乏茲土邑有善舉故樂書之其畝南東并捐助姓名悉勒諸石俾垂永久且願有睹此而興起者是爲記

學校表乙編

勸學所

勸學所在縣治南街古韓義學內設立創于清光緒三十三年七月代理知縣景莖稟委連篤敬充縣視學兼學務總董爲興學起點光緒三十四年六月知縣劉煥衢復行擴充改委苗雨潤充縣視學並委王培鑾董守身申翰周史騰霄四人爲勸學員分往四鄉酌提各社浮費先辦雙級初等小學堂一十三處即北門上原租趙姓市房兩校
合一後移衙東西關西營下良史北廐亭夏店常隆涼樓莊頭郭庄普頭魏家坡是也宣統元年十月縣視學苗被選爲諮議局議員復委連篤敬接任視學適第二班師範生已經畢業又擇南姚王村五陽西山底合漳流渠水碾楸根底大平閭村東北陽王家庄等村增設單級初等小學堂十二遵章教授屢經省視學龔秉鈞馬光裕及京視學劉寶和等查視嘉獎稱爲潞郡設學之冠改革時所務停頓民國三年知事高增奎移設於典史署內委任王修文任視學郝廷弼張傳新任勸學逐漸推廣國民學校一百餘處後增至二百餘處勸學員李炳蔚楊膺榮魏盡善等與有力焉其經費由獻捐項下開支年需八百千之譜

教育分會

教育分會附設勸學所內清光緒三十四年六月知縣劉煥衢同邑紳李慶芳苗雨潤等奉文創立規模略定先就儒學西齋地址議設師範傳習所及自治講習所各一班籌辦新政宣統元年二月改選王煥文爲正會長王培鑾爲副會長陸續建議籌款興學補助甚力改革時停頓數載至民國七年知事嚴用琛移設於西街公館公選董守身王建國孫潤傑連廷輔等陸續充任會長整理會務漸復原狀惟歷任會長暨各會員等純盡義務不支薪金需款無多而收効倍之其會內之組織法尙完善云

宣講所

宣講所由教育分會籌設初派張傳薪苗淳然爲宣講員民國元年知事李兆麟稟准專設宣講所於城內上寺附設通俗書報社委李成蔭張登瀛連承湯任憲章韓文魁五人週行宣講頗有成效後爲山西省長六政攷核之一由省分派各縣椽屬員一人或二人專任宣講經費由縣署行政項下開支民國十一年知事魯宗藩移所於衙前土地祠中督飭各員實行講演始無虛日

師範傳習所

師範傳習所創於光緒三十三年十月知事劉煥衢挑選前清宿儒在儒學西齋立所傳習委連篤敬鄭錫燦李垂庭郭彤廷分任教員傳習半年畢業三十六名三十四年六月續招第二班三十四人委李慶芳苗雨潤王煥文充任教習講授一年畢業派任初小教務民國五年一月知事陳士凱奉文開辦單級教員養成所半年招生二班委視學王修文教員郭望京李文華任之八年三月知事嚴用琛移設文廟東院改名師範講習所用區費餘款開辦委陳國俊孫宗策燕文華任之頭班一年畢業調省

聽講月餘回縣派往各鄉分任小學教務九年三月續招一班如前辦理各呈報有案

高小學校

縣立第一高小學校創於清光緒三十一年知縣劉煥衢係就漳川書院地址及原有公款膏火等費設立初招學生五十名就舊日東西文場改充學舍添置校具請黃競趙海清爲教習郝尙德爲堂董遵章辦理次年連篤敬接任漸漸擴充於禮堂東邊購民房一院修新式講堂兩座又於院之東北角劉令捐廉五百金添購房院一處計四十餘間作爲學舍另有碑記存校民國十一年知事魯飭購劉姓院一處用款三百三十元增修校舍愈行推廣其歷任職教各員詳載官師表中計自開辦以來至民國十一年共招學生一十四班已畢業者十一班總數三百餘名年需的款一千三百餘元育才衆多亦一邑之鉅觀也

縣立第二高小學校原係乙種農業學校民國五年五月知事陳士凱稟請創設委馮奠華任教務依明倫堂爲教室招生一班辦理尙屬認真民國六年校長薛國興任之添招學生一班擇前院隙地種植桑槐多株以資實習至民國七年十一月知事嚴用琛奉文改爲縣立第二高小學校續委連廷輔王建國羅志崇任之年費一千二百餘元合計學生班數招過七次已畢業者一百零一名已於民國十二年遷設南鄉常隆鎮矣

縣立第三高小學校在縣西五十五里寶峯寺設立創於民國九年七月知事李輔中稟請校長燕文華
襄垣縣志 卷之六 學校表乙編 十二
開辦依僧舍爲學舍改修教室購置校具文具等件用款七百五十元招生一班于九年十一月初六日開學原定每年經常費五百九十六元後增至一千餘元由縣款截留畝捐一半項下開支批准有案

縣立第四高小學校在縣北下良鎮天齊廟內民國九年七月知事李輔中委校長郝廷端就廟院改設先招學生一班修置校舍校具共用開辦費六百二十元於本年十一月初二日開學以後每年添招學生一班經常費五百九十六元由畝捐項下一半開支定爲的款後亦增至一千元有案可查

女子高小學校

縣立女子高小學校原屬公立由連篤敬楊逢源等租借城內後街民房捐資開辦招天足女學生二十名聘請宿儒孫安慶任教員實力講解爲風氣先清光緒三十三年八月知縣景堃捐廉二十兩典史趙順增捐廉十兩充作校中經費批准成立有案三十四年知縣劉煥衢寬籌學款年足五百千之譜移設呂公祠院內招生二班派王培鑾重修學舍講堂附設幼稚園一處改爲官立民國二三年間甲乙班畢業十八名先後升往燕都并門及第一第四女師範者不少七八九年陸續畢業初等班六十餘名又於暑假附辦蠶桑傳習所二班民國十年七月於院西增置操場一處知事李輔中改爲女子高等小學校附設國民學校校長張瑞圖任之年需的款八百餘元學額愈充來學者更形踴躍矣

模範國民學校

模範國民學校設於縣治南街文昌祠內民國五年三月知事陳士凱稟請創立原委校長連儒魁任之擇各初等小學生之秀者入校編班教授爲升學便利計嗣後續升續招其程度與國民學校等年需經費五百餘元民國十二年知事魯宗藩創辦國民師範以便師範生練習教授將該校移併國民師範校內並將南關小東門兩校學生一律合併

國民師範學校

國民師範學校設於文廟右首原作第二高小校址內民國十二年知事魯宗藩爲造就國民師資起見稟請設立此校招攷高小畢業生五十餘名委任直隸耿麟閣爲校長每年經費約七百餘元均經稟准有案

國民學校

國民學校自前清光緒三十三年創辦初等至民國十二年止陸續籌設全縣共有二百一十處其經費多由各社浮費或各村地畝內攤起至動用縣地方款及獨捐己資設立者爲數無幾因統以公立國民學校稱之列表於後以便觀覽

女子國民學校一覽表

校地	經費	成立年月	附誌
衛東	由縣籌款一百六十元	民國十年三月	
鹿亭	由社籌款	同上	
史北	同上	同上	
下良	由本鎮斗牙運內起錢八十千	同上	
西營	由本鎮斗牙運內起錢一百千	同上	
磁壑頭	由社籌款	同上	
王家庄	同上	九年	
城底	同上	十一年	

襄垣縣志

卷之六 學校表

二十

飭令改書院爲中小學堂文

光緒二十七年十一月十八日

山西巡撫岑札飭爲通飭事照得牖民之要興學爲先設教之規延師最重是以寬粟直溫著於謨典敦惠文敏紀於春秋未有講授非人而能使材俊蔚起者也前經欽奉諭旨飭令改各府廳州縣書院爲中小學堂現又恭讀電抄光緒二十七年十月二十五日內閣奉上諭政務處會同禮部奏遵旨核議學堂選舉鼓勵章程一摺學堂之設原以鼓舞士氣作育人才自當優其進取之途尤宜防其登進之濫披閱所議章程尙屬妥協著照所請飭令各該省將小學堂畢業學生考取功課合格者送入中學堂肄業俟畢業後考取合格者再送入該省大學堂畢業後取其合格者給照作爲優等學生由該省督撫學政按其功課嚴密考校拔尤擬取咨送京師大學堂覆試候旨欽定作爲舉人貢生其貢生仍留下屆應考願應鄉試者聽俟舉人積有成數再由大學堂嚴加去取咨送禮部奏請特派大臣考試候旨欽定作爲進士一體殿試分別等第帶領引見量加擢用不拘庶吉士部屬中書等項成例以勵通材而收實效等因欽此仰見朝廷作育人材振興學校之至意亟應欽遵辦理所有各府直隸州及運城歸化廳書院均改爲中學堂各廳州縣書院均改爲小學堂院長均即改爲教習以昭畫一而資啓迪省城大學堂教習業由本部院採訪延定有人其各屬中小學堂應延教習即由該各地方官留心物色加意訪求務取品學兼優洞明時務之選晉省各屬延請次年院長向在冬至前後現既遵旨改爲教習應由各屬查訪本年所請院長如係究心實習人品端潔並無嗜好者即出具切實考語訂爲該學堂教習倘本年所延院長

有沾染嗜好諸弊勢須另延及實在遴擇爲難無人可請者即稟請核示再行延定至晉中地居偏僻風氣初開固難得盡通西學之人必先求夙精中學之士庶可導愚啟惑由淺入深各學課程應令就經義史事政治算學分立日記肄習討論俾漸知考求實用各學官存有頒發經史各書各縣署存有各部則例和約各書均擇要發給書院以便觀覽仍派妥慎學生記明部數本數專司收發用免放失自此次通飭之後各地方官仍有曲徇情面濫行延請及不考究功課者本部院即治以玩視學務之咎昔文翁教蜀必延魯國之諸生元禮授經遂培洛京之士氣教習之善否實關人才之興廢慎勿輕忽功令自詒伊戚也仍將遵辦情形稟報查考除分行外合亟札知札到該縣即便遵照毋違此札

重修魁星閣碑記

武鄉進士

李華炳

風水之說傳記所載時有徵驗然必人事克修乃有以迓神庥而接地氣天人之理默相感召非可倖而致也襄垣自咸豐壬子後賢書之舉久付闕如余設帳於茲都人士有以書院地卑局勢不合爲言者壬寅年將改設學堂補苴罅漏余謀諸邑紳於院之東購地數弓北關一門使與考院別爲一局以釋衆疑學師高君精形家言前歲命於尊經閣上魁星樓前每晚懸燈以培文運是秋連生篤敬舉於鄉噫豈時會之適逢歟抑此邦之文明將有轉機耶是年邑紳孟君趙君以奎星閣爲文明所繫年久剝落且城牆內坍塌近閣基面商學師稟請邑侯陳公思所以培補之陳公捐廉首倡鳩工庀材數月而功竣計費百九十餘緡趙君奉學師命將立石而問記於余余維文運之盛衰視乎士習是邦學俗日靡兼以科第久

涇觀感無自此文明所以不振也頃者先路已開士人有蒸蒸日上之勢又得鄉先生爲之培補文運是誠幾有可轉者然必士習克端乃足重科名而光學校余與學師均有教士之責所望爲士者敦品行勵實學勿負師長教育之衷與鄉先生期望之意則文明之培植可拭目俟之矣

碑存明倫堂

樂平校貢 李柳染

劉邑侯捐廉購建學宮碑記

昔唐太宗命五品以上舉堪爲縣令者以名聞豈不以縣令爲親民之官一縣令賢則一縣受其福天下縣令皆賢則天下之民無不得其所哉豫章劉公名煥衢字頌臣宰襄有年矣政績卓著教養兼施進襄民而衣食之教誨之無智愚貧富一也詩云樂只君子民之父母公其有焉辛亥夏高等小學堂乙班生畢業續招丁班生七十名學子輻輳舊舍難容襄紳耆議集貲更建公慨然曰新政繁紛需款孔亟相彼小民何堪重困即捐鶴俸五百緡購建學舍四十餘楹八月榮陞在即學憲諭各屬小學以戶定襄應百校已成者半公又慨然曰此事未藏去有餘責矣復捐五百緡爲購彝器書籍用初等校賴以無缺其熱心學務廩懷民隱雖古循吏不是過嗟乎吏治之壞至今已極竊位鄙夫濫膺雷封重寄非急賦稅而賄長吏即厚聚歛以飽私囊利祿薰心遑恤人瘼公素無非分之征求又以陶鑄國民一再取俸金集事憐民膏之易盡非留犢以爲高此其心即仁者立人達人之心其事亦即仁者博施濟衆之事縣令而人人如公國家何患無才地方何患不靖當公之來守茲土也始下車即創設高等小學堂籌集戲捐丕著新猷實開潞澤之先嗣設女學堂初等小學堂教育會勸學所各機關次第組織嘉惠士林如恐不及豈知

公汲汲於教又汲汲於養瘠已肥民農商皆所軫恤乎一行作吏特沛殊恩使公而登樞府宰封疆其設施更當何如也今者學校宏廠齋廳具備藏修息游無復湫隘囂塵堂中之廣廈千間子弟免向隅之憾凡民之入學以齒父老慶輿人之歌此後教育普及民智大開得謂非公捐廉之賜也耶公固自盡其心然襄人士之戴高履厚不能忘所願學於斯者仰慕高風益敦實學勿徒計富貴利達得志澤加於民不得志修身見於世庶無負公之意公之德亦少報萬一矣是爲記

碑存高小學校

襄垣創興學堂記

王維新

襄垣學堂創始清光緒三十二年邑侯劉公煥衢于宣統間學務極盛有高等小學一所初等小學百餘處初等女學一處皆各有精神省視學調查推爲上黨第一飲水思源吾襄李君慶芳提唱之力居多連君篤敬苗君雨潤王君培鑾王君煥文董君守身皆有功焉先是光緒庚子拳匪肇禍賠款等於亡國朝野士夫咸曉然人民無識以致之均認立學校爲當務之急英人李提摩太承英政府命退山西賠款五十萬兩願立西學專齋於太原十年爲期晉撫岑春煊與之訂約又設中學專齋合之曰山西大學堂選高才生入學肄業李君時爲邑諸生有聲譽被調入堂期年選送日本留學生李君與焉自是李君爲吾襄有新知識最早之一人對設學堂以開民智無時不在鼓吹中舊官與舊紳不之理初不遂歲丙午劉公守是邦會李省親由東瀛返籍始依李君計畫創設高等小學先年冬連苗兩君暨孫君宗武偕之日李君招待力也李君假滿返日本得三人助共同計畫對邑學務提倡益力翌年連苗孫諸君聯袂歸國

時教育會勸學所初等小學尚未辦當局僅位置連君監督高等小學苗得省委任長治高小教員孫辦山西大學雜務員邑人爲之憂有連省三王培鑾郝廷傑等多人公稟苗君返襄振興學務不准翌年戊申正月余與孫君及王君縉雲由省返里請連苗諸君會議於城中義聚和號即余開設之錢局公稟痛陳利害稟上劉公懼始招集全襄士紳會議創設教育會勸學所初等小學二十五逐漸擴充宣統間有百數十處也連苗諸位皆被鄉人毀李君獨甚時有孰殺之詞太史公因負不羈之才遂無鄉曲之譽况李君等處革新之局創驚人耳目之事招子產鑄刑之毀亦勢有所必至者也無足怪哉後之人慎勿謂學務之易辦而輕忽視之願不忘李君等創辦之精神摹效之競勝之俾吾襄二十萬同胞受同等教育世界人民長久共存於天地之間是所望於繼起者

附志捐資學校並得獎者

民國十年魏履祥捐錢一百六十千文郭守城捐錢一百五十千文趙經魁捐錢七十千文輸第三高小校由省長均給有獎

民國七年張家莊米長生以地七畝折合大洋一百四十元捐入本村國民學校由縣長嚴轉呈省長閻給予三等嘉祥章

沿革考

沿革考者襲舊志之名無所用其更易者也舊志載有表圖自唐虞以及明清一覽瞭然可仍其舊
 民國肇興國體雖變縣制未改襄垣直隸山西冀甯道屬因并誌之以示久遠

表圖

<p>唐 冀州域襄垣在王畿內</p>	<p>虞 并州界襄垣在王畿內</p>	<p>夏后 仍唐冀州襄垣在王畿內</p>
<p>商 黎國屬</p>	<p>周 封唐改晉仍黎國</p>	<p>春秋 赤狄奪為潞子國晉滅之為晉地</p>
<p>戰國 三家分晉此地屬韓號古韓後卒降趙襄子築城甘水之北</p>	<p>秦 滅六國始置襄垣縣屬上黨郡</p>	<p>漢 屬上黨郡境內有安民城</p>
<p>襄垣縣志 卷之六 沿革考 二十四</p>		
<p>東漢 屬上黨郡新莽改上黨亭光武復舊</p>	<p>魏 屬上黨郡</p>	<p>晉 屬上黨郡</p>
<p>後漢 屬鄉郡</p>	<p>北魏 建義元年置襄垣郡</p>	<p>北齊 廢郡為州</p>
<p>後周 置韓州</p>	<p>隋 大業初罷州為縣屬上黨郡</p>	<p>唐 武德初復置韓州銅鞮黎涉皆為屬縣改上黨郡為潞州貞觀中州罷以縣屬潞州建中初改潞州為昭義軍</p>
<p>宋 初改昭德軍崇寧中為隆德府襄垣屬焉</p>	<p>金 改隆德為潞州</p>	<p>元 潞州襄垣縣</p>
<p>明 洪武初潞州襄垣縣嘉靖改潞州為潞安府</p>	<p>清 仍舊制</p>	
<p>民國 仍襄垣縣</p>		

附歷代沿革略說

稽古襄垣縣本唐冀州之域虞并州之界夏仍唐冀州商屬黎國周封叔虞於唐至春秋改唐爲晉地戰國初襄垣屬韓故號古韓其地距韓遠而隣趙近故其後屬趙趙襄子席先世之業慎固疆域築城甘水之北得名襄垣秦滅六國廢封建爲郡縣始置襄垣縣屬上黨郡兩漢魏晉皆因之後魏兼置襄垣郡迨北齊郡廢後周置韓州隋大業初州罷以縣屬上黨郡唐武德初復置韓州以漳水侵城築新城於甘水之南貞觀中州罷以縣屬潞州宋屬隆德府金改隆德府爲潞州復隸之元仍爲隆德府屬晉寧路繼復爲潞州明洪武初因之嘉靖間改潞州爲潞安府襄垣其屬邑也清仍爲潞安府屬

民國廢府制直隸山西省冀甯道仍名襄垣縣

裁房歸科記

王維新

民國成立百度變更吾晉爲起義省分凡百舊制務一掃而清之壬子春省政府規定縣制每縣知事以下設民治財政教育司法四科將舊日之吏戶禮兵刑工等房事權分歸四科主持吾襄六房而外猶有糧倉號招等房名稱共十房各房皆有積弊清釐頗不易易楚北遐宣李公繼高令增奎知襄事留并同人推余返鄉主持參事會清釐一切以輕襄人負擔余亦以改革自任逆料清釐陋規時與官吏相背馳恐不易着手比晤李公告以襄人所希望者李公曰請轉告襄人毋以俗吏自我我必有以報襄人即令分科辦事除司法另委客籍外委余與連君篤敬連君清源分掌民治財政教育三科事務有害於地方者除之有益於地方者興之兩月之間百廢俱舉余雖斂衆人之怨而縣欸餘裕如參事會縣議會農林試驗場草辦傳習所戒烟局學堂添購房院并省增置會館派送留日學生天津南京省府各學生津貼等等開銷近萬元並未增加襄人負擔何其幸歟截至民國二年底贏餘欸銀九千兩之多某君呈明省署委員如數提去李公因此調省地方公欸亦日形拮据焉

營建考

營建考者不獨置縣之始當紀其實卽城郭之培補廟宇之續修創建改革作者皆有盛心後之人不可忽也而衙署橋梁之類亦備載無遺其趨事赴功之踴躍可概見矣易建置爲營建與舊志有以異乎

城郭

按文獻通考輿地註襄垣趙襄子所築舊址在甘水之北唐武德初漳水比侵復築韓州新城於甘水之南金天會間知縣韓俊增築水南外城卽今城也周六里三十步高二丈厚八尺池深二仞置東西南北四門上各建樓明洪武三年重修正統間知縣甯智復建樓成化間知縣柳豸更加修理正德間流賊大擾隣近知縣劉明趙永淳因城傾頽相繼修築高厚且堅嘉靖間知縣賈樞以四門樓壞不足威遠於是各築城樓事未竣而擢去知縣葛縉終其事隆慶間知縣李貴和增築城巔周圍各五丈許濬塹二尋砌磚堞一千五百有奇敵臺八座四門樓亦加崇焉又知縣黨馨繼修增東西南三門甕城建重樓三座角樓四座敵臺八座周圍濠塹倍於昔崇正間知縣王懽甃磚城三面高三丈女牆八百九十有一清順治九年知縣李永彪復加修理雍正九年西北城圯知事劉德潤修築乾隆二十七年北門東坍塌知縣安恒奉文修補闔邑紳士人等捐修北面護城土堤改建石工高三丈九尺長二十一丈五尺二十九年西

北門坍塌八丈餘知縣高秉策奉文修補三十六年東城坍塌二十一丈餘知縣賈慎行勸鄉官趙振朝等捐輸修補

縣城 高三丈基闊二丈頂闊丈二週迴六里三十步

女牆 高八尺週迴俱全

堞口 周圍八百九十一

敵臺 四面一十六座今存八座

濠牆 高九尺週迴俱全

城門四座 東曰東作西曰西成南曰陽澤北曰拱辰

門上城樓四座 各三間嘉靖十四年建高三丈

東西南甕城上重樓三座 各三間隆慶五年建高三丈

角樓四座 各三間隆慶五年建高三丈

巡舖門四座

南郭門一座

北郭門一座

甕城內炮樓八座

城上舖舍四十餘間 今廢

金

韓公修城記 名俊

楊丹

襄垣縣古韓州也封域宏廣殆將百里而遙東連巨鎮北背喬峯峻嶺大壑多人跡之所不能至者國家收復之初奸雄繼踵蟻聚蜂屯嘯集林谷每黨不啻數千人號曰紅巾動則彌崗落阜旌旗繽紛鼙鼓震疊數窺是邑直欲鯨吞虎噬當是時故城多坍塌郊邑相望舉無壁壘在城之民將扶老携幼以延旦夕之命耳幸令尹韓公抱忠貞之節懷慘怛之愛率衆死守披堅執銳不顧矢石前攻後突若陷無人之境賊遂稍稍引去於是增修外城且戰且築寇至則荷戈而禦敵寇退則挈畚而赴工故不日而具士民額手相慶曰我輩幸保首領得以完聚者韓使君之力也天會九年春韓公屬其耆老議之曰羣醜雖逃遺類未盡內城修於倉卒姑濟一時然地甚狹隘不能容衆今將建大城以周其外可復許乎聞者莫不忻然樂從遂經營相度計貧富爲等差區方定力咸適均平故人皆踴躍盡瘁更相勸督不數月而告成易曰說以使民民忘其勞信斯言也其城週環六里三十步其墉高二丈厚二尋之半其溝深二仞其上睥睨具焉闢以四門層樓上起壯麗可觀故倉廩府庫可得而長保也神祠佛寺可得而修葺也庠序可得而開設也市井可得而陳列也居民可得而安定也編氓咸喜室家相慶人人皆自謂更生之福矣嘗觀有建一橋以通險阻達一水以利灌溉其善雖小尙可得而頌之矧築城鑿池修而兼創者乎今成久大之功興無疆之利雖垂竹帛勒鼎鐘不爲過矣朝廷嘉其有功遷以榮秩重循良也迄今公去六載襄垣一境無虞四民安業孰非沐公之德者乎余因卽其事而述之

明

劉侯修城記

邑人劉龍

予自留都得謝還里邑耆王祝等來謁曰吾邑城自濮州劉侯築完垂二十年闔邑賴以寧宇維侯之澤不敢忘也請爲記之以志我思予嘉是役久矣茲家居乃獲身庇固樂爲道之按邑城傳自趙襄子始築故號襄垣舊城在甘水北唐武德中復置韓州築城甘水之南天會間盜起鄰邑多陷邑宰俊韓才傑士也大爲戰守之計顧城敝且隘不足恃增築外城且戰且築賊不敢逼皆引去今所居者是也國朝景泰間邑宰甯侯智成化間邑宰柳侯豸相繼修築皆不忘百姓之患時稱其賢正德間兩河山東流賊大擾城以歲久頹敝民皆危懼臥不帖席時濮州劉侯明宰邑躬閱城池曰是惡足與民守哉乃以農隙戒事經營規畫悉有良法庶民子來不假鞭朴逾月百雉皆興周六里高二丈厚稱之城上之塗可行大車邑城之良無以加此濮州以疾故任邱趙侯永淳繼至爲設女堞以終其事於是民皆倚爲金湯雖有潢池之弄荏符之警不足虞矣濮州之政甚與民宜而明敏殊絕人不敢欺修城之役若出緒餘今相去已遠

民猶德之不忘且礪石以紀其績曰見城如見濮州也城居一日即濮州一日之賜使久於其任爲民造福將有進於古之循吏者惜哉不竟其施徒使斯民思之不已時移事改猶諄諄乎言之不置也近商河賈侯樞新葺四門門上各欲建樓會遷秩不果成今昌邑葛侯縉下車屬有警報視城上女堞弗稱及城樓闕者卽趨令修完益爲雄壯亦可謂急於民患矣

李侯修城記

邑人
姚九功

襄垣之沿革徙置不一前人記之詳矣李侯來宰是邑推豈弟之心勵精明之政不期年而政成化行常目擊傾圮欲更新之第恐勞民傷財不忍起大功動大衆隆慶元年九月魯賊大舉入寇破石州屠劫甚慘公深爲百姓憂越明春即大戒於衆增築城巔各五尺許濬塹二尋有餘又以堞臺頻修頻壞反耗財力乃悉砌以磚記堞一千五百有奇翊門敵臺八座四樓亦量薦而崇之事舉而民即樂從工興而事乃底績蓋由公之畫茲舉也工不盡民之財役不盡民之力故樂爲赴公易曰悅以使民民忘其勞語曰擇可勞而勞之又誰怨此之謂也時戶積耗半縮故額公曰諸當道汰逋絕覈實丁哀多益寡劑量而歸併之此非尹鐸損戶數以保障晉陽之遺意乎其他革吏弊詰奸慝抑豪橫禁賭博捐貲以修學宮節財以省冗費善政不一而足而冰蘖清操一毫不染宜其由心達政而衆美之咸集也邑士民索予言以誌不朽予因樂爲之記公諱貴和字于中號節齋河南祥符人登嘉靖乙丑進士時贊定判簿陳力教諭賈錄司訓宋時儒曹相咸與有勞而督役鄉民王斌等皆得書於碑陰云

襄垣縣志

卷之六 營建考

二十八

清

劉公修城記 教諭 李珊玉

襄邑一城韓山峙其北楞巖跨其西漳水環其南而絡其東誠上黨形勝區也其創建廢興之由遠不勝述第城之東西南三面皆磚砌北面獨爲土築又當甘水之衝雨淋水泛日漸脆薄及今不葺且將與波俱逝也戊申仲冬邑侯劉公以三韓世胄來蒞茲邑甫下車閱城見其頽敝若此即慨然以修墜爲己任顧其時未可越明年春政治人和乃捐俸購材經始西北隅去城基數丈許下用石砌上用甃甃俾遠何患儼然稱鐵甕焉繼修北垣再修再圮費幾不貲公一以保障爲心務期事之必濟而後已區處規畫不遺餘力而邑中慕義士民亦罔不踴躍鼓舞謂此吾地方公務寧忍獨累及賢父母爲也因悉力捐輸一切雉堞樓櫓漸次修整煥然一新不直北面壯觀已也役起於己酉春竣於辛亥秋歷三歲而告成闔邑紳士耆民不忍沒此嘉績索余言以誌不朽余惟勞民莫重於土工而築城爲最公方懼其竭民財盡民力也而民輸將恐後乃如此雖靈臺之章何以踰茲余不文尙能質言之易曰說以使民民忘其勞詩曰豈弟君子介爾景福卽襄邑上下相與有成之誼也爰次顛末垂勒永久云公諱德潤字身公號誠齋順天文安人

續志城垣

北城磚包邑城自前明知縣王懷磚包三面北面仍係土築道光五年知縣張力卓一體磚甃金湯鞏固

民永賴之又東南城磚壁坍塌十八丈同時一律重修立有碑記

西門甕城並城樓咸豐七年知縣孫福清重修

修葺裏城垣牆四圍裏城壁壘日久未修雨霖水穿傾塌三十六處茲於光緒五年逐加修葺磚壘土築一律完整

重修北城牆碑記

邑侯
張力卓

縣以城得名二千年無改謂趙襄子所築也遺址疑在史水之北東西故縣村志云甘水北按其形勢恐未然今城建於唐增於金周六里三十步明及清朝屢加繕治東西南三面磚包北面僅具土胎以瀕甘水故余於道光三年蒞任南面已坍一十八丈北陔缺人獸可踰樓堞之壞浪窩之穿指不勝屈乃集紳士勸捐重修四載而工始竣北面四十五丈概包以磚臨河者砌礮立脚以禦冲刷一切塌損之處悉爲補葺高厚多過於舊內外門樓八座角樓四座小樓六座敵臺七座砲臺一座女牆八百七十四堵翼然維新計用錢文一萬五千四百餘千除本縣暨殷戶損錢合銀三百兩以上者詳明

上憲奉邀議叙外凡屬勞力輸財莫非公尚義一并刻石以垂久遠

東城門樓光緒十四年知縣沈士鏞重修督工人許三傑連飛熊孟崇旺王傳緒郝儒英

南城門民國十一年知事魯宗藩補修監修員趙允元

西北垣外牆長三十三丈東北垣外牆長十丈西垣外牆長十七丈傾圮有年於民國十四年知事許喆

襄垣縣志

卷之六 營建考

二十九

招集全縣士紳苗雨潤等四十人議修選派連篤敬王維新趙懷璧三人爲幫辦狄廷芝趙允元趙謙吉郭永慶李儒鈺張錦緹李華秀趙福清韓多慧唐道僧十人爲監工又於民國十五十六兩年續修城垣之內牆水道門樓角樓敵臺女牆城根石基一律完整共費大洋一萬二千四百餘元由錢糧內帶起另有碑記詳後

縣署

縣署在城北癸山丁向元至元七年知縣韓俊建至正二年知縣閻仲榮大爲營構元末毀於兵燹明洪武二年縣丞魏惟明重建嗣後知縣趙永淳史筆王尙禮公一揚田子堅杜汝愨各有增修清康熙時知縣鄭宜建退思堂三間袁良建影城樓一座大門外申明旌善二亭乾隆三十五年知縣賈慎行重修鐘鼓二樓四十二年知縣李廷琰重修退思堂儀門外東西壯快房四十五年知縣李廷芳重修大堂三間聖諭坊一座大門三間儀門三間大門外照牆一座東西柵欄二座二堂三間退思堂三間改退思堂爲寅畏堂大堂匾列清慎勤三字

典史宅在大堂西舊主簿宅也明天啟七年裁改建大堂三間二堂三間三堂五間大門一間二門一間典史陳元順重修

衙神 在大門

土地廟三間 在東

馬王廟 在儀門外東○縣丞宅也雍正八年裁○知縣張仲熊改建

三聖堂 在堂後東
今改書房

獄 在儀門
內西

常平倉 在大門
內西

鐘樓 在大門
側西

鼓樓 在大門
側東

申明亭 在大門外西康熙四十
五年知縣袁良重修

旌善亭 在大門外東康熙四十
五年知縣袁良重修

傾銀偏房一間 在二
堂東

更夫房一間馬夫房二間馬棚二間 俱在二
堂東

公署

廐亭驛丞宅在縣西六十里廐亭鎮洪武時縣丞魏惟明創建永樂時知縣薛謙重修成化時知縣柳豸改建乾隆二十八年裁廐亭遞運所在驛西洪武八年創天啟七年裁

五嶺山巡檢司在縣西南七十里五嶺山之陽洪武三年縣丞魏惟明創修天啟七年裁

察院行署在縣治東南洪武八年知縣李珪建成化十七年知縣王溫重修清雍正時知縣張仲熊改爲節孝祠餘隙地爲花布市

布政司行署在縣治西南洪武八年知縣李珪建成化二十二年知縣劉瓚重修 今廢

按察司行署在縣治西南二十步乾隆二十六年知縣安恒改爲城守營署大堂五間營房十間內房十間

陰陽學在縣治南五十步洪武三年縣丞魏惟明建 今廢

醫學在縣治南四十步洪武三年縣丞魏惟明建 今廢

僧會司在縣治東南今在亞嶽廟

道會司在縣北門外先天觀

講樂臺在縣治東南數十步道光九年知縣張力卓建修

儒學咸豐元年知縣孫曰庠同教諭劉梓材訓導王儒重修立有碑記

縣署同治十年知縣陳松齡自內宅至大門外照壁一體重修與前志所載圖畫間架多有更改立有碑記

捕署同治十一年知縣陳松齡同典史高傳紱重修

城守司同治十二年知縣陳松齡同外委千總王銘重修立有碑記

巡警營在縣西街即舊日城守營署自光緒二十八年改設三十三年管帶郭彤庭增修營房十餘間招足巡警六十名至民國八年兼設第一區區公所於內

地方公款局自民國六年開辦原設縣署東院民國十一年價買衙東街路北劉成房院一所內計兩院二十五間共用大洋三百三十元修理居住永遠定為公款局辦公之用

西街公館一所前後兩院房屋共三十一間自咸豐十一年由公購置原為前後任交接暫住之所其契紙現存縣署 民國八年五月七日知事嚴用琛稟准公館地址同紳議定作為辦理地方各項公益之用現設教育分會及山西醫學研究分會於館內

育嬰堂在城內街道街路西光緒二十年知縣沈士鏞創立前後三院共房三十四間有買契二張存縣署係官督紳辦官督紳辦有碑記可攷姚令手又買西城莊地七畝契紙存堂

洗心社在縣治西南民國十一年知事魯宗藩創修大講堂五間講演臺一座北面配房十一間圍牆三面洋式大門一座立有碑記附後

第二區區公所在縣西六十里鹿亭鎮東門外東坡底村之三元宮設立
第三區區公所在縣北三十里下良鎮五瘟廟內設立

商務分會清宣統元年六月八日知縣劉煥衢稟請設在上寺院內移北街關帝廟後院設立

縣農務分會與蠶桑分局並設地址在東門外呂祖廟內廟旁舊有試驗場改為桑圃公舉農林畢業生

襄垣縣志

卷之六 營建考

三十一

邢廷輔為會長兼局長事于民國元年十一月初四日成立以後逐漸擴充植魯桑湖桑數萬株增置桑田五十七畝九分頗著成效

襄垣會館原於民國二年在省大袁家巷路東公購民房一院設立後以難修拍賣於民國十六年四月價買東校尉營門牌八號王鳳蒼房院一所內計東西南北房各五間大門一間廁所一間共二十二間東至任處西至道南至施處北至車路實用大洋二千六百五十元由公購置契存縣地方公款局作為全縣會館之用

平民工廠在西關街路南設立民國十二年知事魯提用地方公款一千五百千文購買張姓當舖院一所創設內計房屋二十五間樓十九間契紙存公款局專為提倡平民演習工藝之用

衙東路南舊買房院一所正廳七間東西房各三間大門一間前院一方南牆外至路姓界現設初等女子國民學校

保藏公物所在南街教育會內附設於民國十六年十二月一日開辦由黨部縣政府聯席會議推舉每區各一人為監察員輪流監視各機關所存之公物一年一任為義務職並設管理員一人由教育會書記兼充之年需大洋約百元左右

臨時登記處於民國十七年七月二十八日成立依中國國民黨山西省黨務指導委員會議決委任魏擁祥孫守明為襄垣縣黨務指導委員開辦臨時登記事項月支大洋一百元以舊日儒學地址為辦

公處

鹿亭差務處一所於民國十七年六月新修南庭五間東西房各三間北房四間大門一間合計修理費共用大洋七百七十二元餘由地方公款支出爲全縣公產以備鹿亭辦差之用

軍電分局設在城內土地祠於民國十七年十二月二十日成立正局長一人局員一人工人二名火夫一名每月經費大洋九十五元由縣支給

重修官廨記

胡祇適

君子之居雖一日而必責况官廨乎官廨之不可闕雖遐荒異域陋邦小壤皆知之矧際一統數萬里居中處正太平久安之治世乎一縣之治區域幾何然而國家典籍圖誌簿書條章之所頓落兵農工賈賤小大之所歸訟承流宣化發號施令徵科供辦之所指聚胥吏卒隸晨昏風雨之所停集所係如此雖三尺之童亦知其頃刻之不可無也居士官者恬不知問反爲之語曰官不給錢役不可擅舉欲有規畫興作惴惴焉惟恐其民之多言也至元十三年秋巡按河東過遼州襄垣二城官廨一新異於他邑間之蓋守土者從輿望協衆力而成之也詢其所費錢不取於官而民無異辭一木一斲而不敢私焉竊嘗有言人能以事父之心事君愛子之心愛民治家之心治國雖不學無術亦可爲良吏賣卜貨藥技之賤者也尙知僦屋布席張幕先爲有衆歸嚮留止瞻集之地而後求售其術五馬之榮百里之寄無一字之聽斷而莫之恤是其爲心賤技之不若也爲臣之心寧無愧乎此獨異衆例而力行之不可不書以勸隣邑

襄垣縣志

卷之六 營建考

三十一

至元十七年仲夏初三日立石

重修明倫堂碑記

已酉夏余奉檄調守茲土蒞任伊始恭謁

孫日庠

聖廟旣而投刺於學博兩先生徘徊四顧目覩明倫堂坍塌剝落且規模卑狹不足以壯觀瞻至東西齋房基址傾圮幾蕩然無存竊念學宮爲風化源頭不可不急爲整理爰集諸紳士共商斯舉翕然稱善用是募衆勸捐積貲一千四百千奇譔工於六月初吉閱半載而告竣增其式廓以及崇聖殿尊經閣忠義節孝兩祠次第更新因以見人心好善不吝財不惜力一倡而百和者厥非無自憶前任黼侯卓君於縣治東偏創修漳川書院與夫考棚號舍咸稱盛事余承乏茲土思以興學立教勢不得因陋就簡繼自今覺序丕振文運將蒸蒸日上尤望後之君子廢者修墜者舉其方興而未艾也可於此日卜之

重修襄垣縣署記

邑侯 陳松齡

諺云官不修署執是說也天下無署矣夫署關一邑之風脈萬目仰瞻而任其荒蕪頹圮無論居者有覆壓之虞卽觀者亦覺黯黯無色則甚矣署之不可不修也同治庚午予來宰斯邑下車之始假館漳川書院而講堂有不設公館之碑覩之心切惡焉急欲移居乃周覽廨宇數十楹無一完固可居者二堂後壁嵌有碑誌云明成化年修蓋四百年有茲矣厥後雖有修者不過補苴罅漏云爾無怪其荒蕪頹圮若是也不得已進邑人士商以捐修僉曰可於是有人寓捐於賦者農也有書捐於簿者商也計得四千緡不足

余爲籌款以措遂鳩工庀材自仲秋以迄仲冬凡四閱月而內署之工竣始移居焉夫物無白不形黑無妍不形媼已修者輪焉奐焉未修者摧如棄如抑不足爲觀美矣况乎胥吏無值候之所囹圄有逃越之憂倉儲多霉朽之患是猶不可不亟爲經營者因復以續捐商諸紳富承諸君子慨然欣助又重承二十八里人等源源接濟衆擎易舉有志竟成需費萬金歷時三載至癸酉孟冬乃蒞事公餘之暇與幕中諸友登瞻雲亭以望見夫萬瓦鱗次鳥革翬飛東山之烟雨夕照之雲霞時時相映作采回憶昔之荒蕪頽圯景象恍若別開境界矣乃聞邑人士有竊竊議之者曰官不修署之說竟未可概論也余曰然

創立育嬰堂碑記

武鄉 李華炳

三代仁民之政見于載籍者禮記養孤書言保赤周文發政施仁于窮民之無告者皆有常餼後世育嬰堂之設蓋權輿于此顧良法美意通都大邑所在多有而罕見于簡僻之區非必絀于力格於勢也有司執掌于錢穀簿書案牘勞形無暇撫字則有視爲迂而不欲行畏其難而不克行者矣故非仁愛發於至誠事事爲民生計者則善政無由舉非踵事者之仁愛一如乎始事者之誠則一無以擴充而善其後吾觀於襄垣之育嬰堂而歎三公仁愛之誠前後濟美其善作善成以造福斯民者洵大異乎俗史之所爲也辛丑夏襄之董事紳士以育嬰堂顛末不可無述思所以垂久遠者進而言曰襄舊有育嬰堂載諸邑乘滄桑變易基址無存前邑侯天津沈公蒞襄十餘年政成人和百廢具舉深維襄民瘠苦撫養維艱因有育嬰堂之議捐廉首倡復勸寅僚紳商捐助得銀二千五百兩有奇除購房屋器具器用外發鹽當生息

詳憲立案妥議章程俾董事分月經理遂于己亥之春開堂收養育嬰堂之創舉也蓋自沈公始也顧規模雖具經費未充沈公蓋猶歎焉故升任平遙臨行託於接篆清苑翁公翁公履任未久值時勢艱虞有志未逮今署篆浙東章公翁公至戚也翁公以事調省仍以沈公所託者託之客歲秋成早歉年穀價昂堂中經費告絀公思所以推廣之而未得也適同年友太谷閻孝廉雙玉以事來襄公與談及復愆慮之遂慷慨出三千金俾充公用公商諸紳耆發鹽當生息三分其數以一歸書院一備團練一給堂中經費育嬰堂之擴充也蓋章公實成之而以成翁公之志也昌黎不云乎莫爲之前雖美弗彰莫爲之後雖盛弗傳三公仁愛之誠後先輝映蕭規曹隨此物此志也今將立石以詒來者夫子其序之乎余設帳於茲數年矣課士之暇蓋嘗從三公游聆其言論而想見其子惠之仁今觀于士人之言益信雖然三公之年章公爲最少而蒞襄之日亦尙淺時事多故以兼攝潞篆席不暇煖使得寬以歲時從容掣畫推保赤之仁以保民則民生可遂擴養孤之誠以養士則士氣可興異日德政覃敷即以媲美于呂叔簡先生之治績無難也是尤襄人之所厚望于公者也余因士人之請而喜于獲睹三代之仁政也于是乎書沈公名士鏤字聲甫庚辰進士翰林院庶吉士今升任解州知州翁公名保昌字禮卿乙卯舉人今署平遙縣知縣章公名之傑字仲選戊子舉人

重修襄垣縣廟學記

提學 沈 鐘

山西潞州古上黨之地屬邑襄垣相距僅三舍許山拱揖如游龍水環繞如帶耕壤錯如棊井巷居廬密

比如麟次蓋山西稱州者惟潞爲首而潞州屬邑惟襄垣爲首稱焉乃者柳侯由成化壬辰進士甲午來知邑事年甚茂才氣甚果銳有爲始至延訪民瘼廉得鄉之豪健爲訟者繩以法餘黨至連章交搆卒不果誣後悉竄屏他所不復一吐氣良民始獲安堵以居每朔望詣學晉謁孔子廟下已而登明倫堂令諸生講析經義問課殿最而罰賞有差惟時廟學歲久滋敝侯顧瞻咨嗟亟欲修葺緣歲弗登未果越明年乙未歲旣登民用和洽爰出公帑羨餘及募諸殷家之好義者助之貲用是市材僦工彷彿經始勿亟之意而勸相之始事於二月初九日廟則自大成殿兩廡戟門暨聖賢肖像祀器炳然爲之一新學則貨地於居民之鄰之者重建明倫堂五楹東西齋十楹中外門各三楹餘若饌堂神庫齋厨稱如門之數蓋不惟增新而視舊規宏廓倍半迄丙申四月二十有八日告成許人劉學諭溫陝人王司訓壽請予識其事用嘉侯之功日篤不忘予惟孔子刪述易書詩春秋禮樂垂憲萬世固宜萬世之所崇祀矣然其讀易獨至於韋編三絕蓋易與天地準不出於時孔子之心與易相爲流通而乃聖之時者故在當時時止則止畏於匡微服於宋絕糧於陳蔡不損焉時行則行爲魯司寇相禮於夾谷不加焉行止無往非時則無往非易亦無往而非天今茲青矜士子毓於學宮號稱誦法孔子者今日之止將轉而爲他日之行矧觀茲廟學之新蓋亦圖所以自新而可不恤其行止戕乎天而悖戾乎易之時也耶尙其無曲學以阿世無利祿之慕而身家之圖斯不爲孔門之罪人矣乃若柳侯之新廟學固所以尊崇孔子亦所以作新乎士類焉而作新士類之心蓋亦不出乎此侯名豸字廷直河南睢州人云

創修洗心社記

楚北 魯宗藩

天地何以安其位曰安於心民物何以育其生曰育於心百功庶事何以貞其職守曰貞於心心者學術治術之本源也世運之隆汙國祚之興衰風俗教化法制之文野無不有主宰者轉移於其間是心之爲用關係大矣惟其靈機之變化無常趨向之善惡靡定是非有滌盪六塵之願澄清五蘊之功而求復其本體也難矣此洗心之學不得不講也能洗心則道心生而人心退處於無權堯舜之學唐虞之治不外此也時至今日國猶事也而治術亡矣人猶是也而學術亡矣治術學術猶是也而人心亡矣將欲救國必自人心始將欲救人心必自洗心始將欲研究洗心之學而實踐之必自普立洗心社始惟我 兼座閻公本悲天憫人之志爲正本清源之計自省垣創建洗心社以來各縣官紳聞風效法由是南北千里相摩相盪皆設有研究心學之專址而襄垣獨無之今年夏余來守是邦諮于耆士擇縣署右側隙地仿城旦鬼薪之法釋罪徒以工代贖委本署承政員趙鴻春公款局經理趙允元共同監修鳩工庀材不逾月大工落成邦之人欣其費省而事集也皆請記之以重其役余不學奚足以言治姑爲言心之體用所關於世運國祚風俗教化治者大俾相與觀摩而省惕之且以中國猶有未亡之人心者皆兼座閻公之力也于是錄而存之民國十二年知襄垣縣事楚北魯宗藩謹記

許公修城記

王維新

襄垣城築自趙襄子舊城在甘水之北今城在甘水南廣六里三十步創始於唐增修於金明清兩朝屢

加繕葺前人記之鑿鑿夫城之修築多感於地方之不靖爲時勢所要求不得不然歐亞交通以還世界日新需要各異留學之士有鑒於列強之風尙謂城垣阻礙交通多有拆城之議余嘗宣力國事奔走南北見天津之城拆上海之城拆廣州之城亦拆在此全國更新力圖富強日趨拆城之候而吾襄又復修葺者何故蓋山西地處高原與沿海之省分不同襄垣位居深山與交通之縣分迥別又兼國家多故風鶴頻驚時勢所迫不得不然耳襄城北臨甘水頽廢頗易西北垣之外牆正當縣署之後座勝清末葉早經傾圮約長三十三丈余髫齡時曾見有人不時上下距今已數十載矣繼此而坍塌者東北垣外牆長十丈西垣外牆長十七丈然亦皆在十年前也彼時國家承平無人顧及嗣後小有不靖又爲拆城之新潮所阻故屢議而屢罷己未壬戌兩年雖經趙君懷璧薛君國興趙君福清路君煥紋張君玉璽監修東北垣根基趙君允元王君傳薪監修南門瓮城而破壞最大之工程數處依然如故也歲乙丑許公守是邦覩城之殘缺不齊不足以備旦夕會省電令著意城垣公卽召集闔邑紳耆會議僉以工程浩大需款匪輕恐非捐輸所能急速竣事議決由錢糧帶徵每正銀一兩帶徵大洋四角共徵得大洋一萬二千八百九十六圓零九分二釐公布招包西北垣東北垣西垣三大工共出工料大洋七千七百一十五圓四角六分六厘工成而尙有餘資協議補修垣之內牆水道門樓角樓小樓敵臺女牆根基應補者補之應加者加之高厚堅固煥然聿新共出大洋四千六百五十圓之譜條項數目刊列碑陰是役起於乙丑六七月工成於丁卯九月三日三載而始成中經遼戰一役地方多事所幸城垣補葺藉以守備盜賊

聞之寒膽人心賴以安謐是城之修而適其時地方獲無窮之利許公之功足與韓侯修城後先輝映工竣屬余記其事余亦幫辦之一人略知顛末並念襄城之修保障於襄垣人民處此紛爭之局有所恃而不虞驚恐固屬利益多多而汽路開通襄垣變爲上黨之中心襄城得失動關成敗總司令閻公最著意焉是城之修更關乎上黨許公之功豈徒庇覆襄垣已耶是不可以無記然人羣進化或有拆城之一日而吾襄垣之交通在此後幾何年月變如天津上海廣州之繁盛爲事實所迫不得不拆則又爲人所難預測襄城之修正應時勢之需要因襄垣之時勢與各處之時勢微有不同故拉雜記之以銘許公之功許公名喆字少芸趙城縣人山西大學堂西學專齋法律專科畢業三等嘉禾章國務院存記簡任職任用云

壇壝

山川社稷壇在西門外壇橫直二丈五尺高二尺二寸大門一座乾隆三十九年知縣賈慎行重修風雲雷雨壇在南門外壇橫直二丈五尺高二尺二寸大門一座乾隆三十九年知縣賈慎行重修先農壇在城外西南正殿三間東西房各二間壇橫直二丈五尺高二尺一寸大門一座二門一座籍田四畝九分雍正八年知縣張仲熊奉文建設乾隆三十九年知縣賈慎行補修雩禮壇在先農壇內厲壇在北關東北正殿一間週迴壇垣五十八丈乾隆三十九年知縣賈慎行重修

至聖先師廟在縣治東南見學校

關帝廟在縣治東乾隆元年重修

城隍廟在縣治西南隅洪武三年縣丞魏惟明建造知縣蕭守身重修

昭澤王廟在縣東南乾隆三十四年重修太乙真人殿康熙五十九年重修

聖母殿乾隆二十三年重修

八蜡廟在東門外 按周禮註疏八蜡一曰先嗇若神農二曰司嗇若后稷三曰農若田四曰郵表畷郵亭舍也表田畔相連畷處造

為郵舍田峻五曰猫虎猫食田鼠虎食田豕迎戶祭之六曰坊坊堤也蓄水亦以障水七曰水庸庸溝也受水亦以洩水八曰昆蟲如螟蝗之屬祭司嗇也祭

百種以報嗇也饗農及郵表畷禽獸仁之至義之盡也乾隆四十七年增修香亭三間東角堂房五間東房三間大柵二楹

五龍廟在北門外甘水之北乾隆三十二年重修

五瘟廟在西門外順治甲申年創建

三元宮在縣治西街

顯齊王廟在縣西北送返村

顯濟王廟在縣北二仙港

靈貺王廟在縣西南三峻山

劉文安公祠在縣治西北隅

襄垣縣志

卷之六 營建考

三十六

魁星樓嘉慶十二年知縣王元楸重修同時在城外東南十里聖王腦建修文筆是年發科

媧皇宮道光八年知縣張力卓重修大殿香亭有碑記見後

文昌閣在南門外舊係千佛閣日久傾圮道光十年知縣張力卓重修改祀上層文昌樓中層河神廟立

有碑記見後

先農壇舊在南門外西南道光二十年知縣倪慎樞移建東門外一里許

變元宮道光二十年知縣倪慎樞建修在東門外先農壇西偏

文廟兩廡道光二十四年知縣卓熙泰重修有碑記

龍洞廟同治四年知縣陳宗海重修大殿香亭樂樓山門等處立有碑記

龍洞山同治五年知縣陳宗海重修行宮一所有碑記

廟宇

關帝廟在縣北街東元明清時各有重修碑記民國五年奉文與

岳忠武王合祀改名關岳廟廟前豎銅旗杆一對高二丈餘係道光十年屯留人楊星鑄造

龍洞廟在縣南門內東祀唐本縣焦將軍諱方乾寧元年建宋崇寧二年賜額靈濟廟大觀四年特封甘

澤侯宣和年封照澤公金時進封為王明洪武初封海濱焦龍神即改封為龍洞神清同治二年由昭

澤爵加封康惠十二年又加封靈感詳見本廟重修龍洞山行宮碑記民國九年山西督軍兼省長閻

賜甘露普被四字匾額一在縣東北二十里西寧靜村宋大中祥符七年創建一在縣北五里北底村元延佑元年重修一在縣東南二十里郭庄村修於金大定年間一在縣西十五里南田漳村有元時匾額尙存

李衛公廟一在縣東三里北李信村修於明洪武年間奉祀唐衛公李靖至五代宋晉歷封靈顯靈澤王清光緒間加封翊運一在縣南十里甘村廟有唐天祐間經幢尙存

護國顯濟王廟在縣北十里二仙港建於清康熙年間相傳係周時晉國先將軍諱軫宋封顯濟王歷宋與金特加嘉澤顯濟王明洪武初定號伏牛山龍泉之神民國九年重修廟內立有路煥文所撰之碑記

魁星樓光緒二十四年訓導高篤隴令趙鳳儀督工重修並豎燈杆每夜懸燈以昭文運

三仙聖母廟重建自漢甘露年間每次修葺歷有碑碣可考在縣西三十五里棗林溝廟坐石山之中下臨清溪小河鄉人求子有禱即應每年三月十八日十月初二日兩次大會進香甚衆廟東有石洞一孔深五丈許底通 聖母座下內有湧泉偶遇天旱鄉人入洞取雨輒應

寶成寺在縣北四十五里城底村西南隅創建年月荒渺難稽宋祥符元至正明天啓清康熙重修四次俱有碑碣可考

永平寺在縣北四十五里南坪村西北隅

襄垣縣志

卷之六 營建考

三十七

百峯寺在縣北四十里趙王山麓地名禪上寺內有羅漢像一十八尊俱是鐵鑄

黃梅寺在縣南東王橋村寺內有佛殿三間古松一株勢若參天又聞寺旁黃梅叢生故名

重修大成殿記

邑人 楊仁風

古者致治之盛衰視學校之興廢夫學校王政之本也襄垣舊有廟學天會間縣令韓俊增築外城徙學於縣治之左創其殿宇廊廡講堂齋舍厨庫門牆畢備當是時被其涵養者多士濟濟未幾兵戈蹂躪殘民始脫鋒鏑學者亦散之四方俎豆之事或幾乎息矣國家推恩選舉通經者復其身諸道舉上下釋奠之禮縣之守官者始創小殿三間以奉丁朔厥後轉官移政因循弗克舉帝臨御之初首頒明詔重以學校爲諭監縣撒里察縣尹傅仲禮主博部思敬視學小殿圯大懼不稱詔旨遂改作之經始於元貞二年二月大其禮殿五楹工未畢而傅尹得代何灝繼之苑大亨又繼之同時承乏者監縣忽覩主簿賈得仁重興舊政再續前功於大德四年仲秋之吉告成其教授李謙從事陳化基條具其事謁予記之自念鄉國松楸之地廟學之記弗可辭因以予之所憂者告之夫善爲政者急其所急以及於其所緩而經理於緩急之際亦各有方彼緩之與急而不知舉付之悠悠然者烏可與共事哉且一殿之役前後易縣之兩監三尹二主簿五歲華矣豈可悠悠然者害之必得爲之後者而乃僅能告具耶殿則大矣美矣尙且從祀之位未升於兩廡而厨庫祭器泮宮之制始及半此其成不知幾何時是不可憂者乎而又有大於是者孟子曰人之有道也飽食煖衣逸居而無教聖人有憂之使契爲司徒教以人倫其於明詔之旨若合

符節謂學校風化之原人材致治之本非學校無以作成人材非人材無以共治天下承流宣化者可不以爲己任乎若夫姑圖塞責略而不周或有廟無學有學無教使士民日用之道蔽而不知固有之善迷而不復行見安於暴棄矣又烏有人材之望哉是則憂之大者也昔文翁之治蜀也興禮殿開學校以詩書教人故一時長老少少親親尊尊百姓順服蜀之有儒自文翁始今也有前規之可襲有明詔之可體誠急其所急建學立師亦以詩書教人修其孝弟忠信入以事父兄出以事長上窮經修身以待國家選舉即前日之文翁也勿以暫久易其志勿以遷代動其心且一日未去有一日當爲之事又豈可虛度哉士民日益望之予亦日益望之春秋大復古謂其復之而當也若學校之復古可謂當矣春秋之法宜書予雖老尚能秉筆以獲見有成當爲諸君屢書云

廡亭先聖孔子廟記

邑人張 碧

廡亭即古下廡聚也民物繁庶實如縣都自有唐立素王廟丁五季兵火惟餘石像露處城西榛莽中宋熙寧間鄉耆尙慶等創修廟貌始建兗鄒二公及十哲於傍仍繪七十子諸大儒於壁春秋釋奠始可瞻仰金末廟像復爲邱墟夫古者國都近邑以至閭巷莫不建學立師廡亭人民市肆雖不古若廟基石刻並存屢興屢廢得無待其人而後舉之乎元貞初士民鄭全屬鎮人康安李英孫興等慨然修舉鳩工度材爲堂十二楹其他稱是漸復宋舊規焉元統甲戌碧過此仰止殿庭下全之子庭珪在側曰我先人董衆經營於是有年矣今始見功吾四家之力也但念祀以報本固儒者事以吾徒士庶而裸將於廟無乃越禮製乎予曰禮不敢過亦不敢不及祭祀禮之大者也尊師重道閭巷與都邑無異有其舉之莫或廢也亦何越制之有近世大儒靜修劉公曰孔子立人道者也吾之所以爲人有君臣父子而不淪於禽獸者是誰之力與觀此則汝等奉祀聖人二時俎豆於義亦可乎庭珪唯唯越二年繪事畢庭珪已歿魏氏子居仁謂其父忠有功於廟恐泯其傳謀於康秉彝李思仁來謁乞文以勒石予繹前所告庭珪者爲書之並記沿革歲月云

朔建廊廡之記

邑人劉 沂

元至元冬十月永平楊綱來尹襄垣既下車仰止大成至聖先師孔子廟瞻宮闕之隆崇陋廊廡之湫隘不足以稱視事僅閱月卽詢同寮達魯化赤札刺兒丁主簿藺亨請以修完泮宮爲先務仍同商之耆德李思敬張履道俾董其役懇譟學宮築蓋始末對曰廟經金季覆圯國初草創仍故材構庠屋三間棟棟年多頹朽作縣者蔑不加省越中統至元之盛文化大行元貞二年二月縣令傅仲禮世際文明閔孔庭榛荒同寅協力始掄材方斲增卑爲崇比瓜及功卒未遂迄大德庚子歷尹何灝苑大亨繼葺凡五涉年僅完禮殿聖像餘悉未遑有碑紀其事延祐間縣尹郭思敬建東西廡凡一十楹規模窄隘且功未集而解篆自後晉寧何巨濟繼政憤前尹經營失制遂不修理乃相殿崇卑別建戟門於前意後人必有大改作者坐是瓦落椽折日就陵遲自始距今垂四十年而功未成公慨然歎曰綱昔主鄒縣簿嘗躬詣闕里瞻仰廟堂堅整高明視王者居乃知聖明尊尙孔道之至古無有加鄒魯間衣冠濟濟謂天下皆然及觀

是邑荒廢乃爾甚愧職敦勸者弗稱上意且予家世儒素爲遼金著姓登進士第起家至封侯食邑者數人綱不才奉家牒罔敢失墜矧國典興學校責守令親民官茲而不力上負朝廷委任之重下墜祖宗遺訓於臣子之道實有所愧是欲辭可乎寮臺坴和衆口一談鳩金峙糧儻功徵役費出閭右輕財之家不傷其生役利皆竄逐末之徒因糊其口肇端其年蜡祭之後落成翼歲秋丁之前資用出納一委張李二人已無所與惟黽勉朝夕以督衆工跬步周旋不啻家事故斷度朽壤陶冶等匠莫不趨事致技功遂早休人無怨咨屋總餘五十楹度費一萬緡四闔翬飛環拱於旁羣賢配食像儼如在講肄有齋休宿有廬翼翼渠渠堂廡相扶一如何尹所造棟宇之崇獨異他邑每春秋上丁公率僚佐諸生以享以祀梁盛豐潔禮備樂和遠近來觀皆大喜稱嘆以爲禮樂衣冠復見今日於是民俗歸厚弦誦相聞文物之盛蓋不下鄒魯矣元統元年十二月受代邑人覩豐功伊濯恐泯其傳伐石劓銘以昭後世命進士張碧疏其事寧州尹秦公仲禮御史李公時進安州判官李公惟煥以文屬沂沂擢科第實用是出身義不可讓竊惟吾夫子集大成之道六籍俱存扶植綱常萬世永賴固不容妄肆蕪辭稱譽其美古人有言曰譽天地之大褒日月之明祇益愚惑耳按襄垣三代爲鹿台取縣治南鹿台山名春秋爲韓別都地近趙遠韓後遂爲趙有城因囊子築故爲今名歷代因革城池遷徙備見大參楊公碑今不必書惟是楊尹爲邑葺廟敦學不專政而尙教不恃刑而化心所謂事有似緩而實急者視世之簿書期會爲政措心奚啻霄壤故表是意語夫邑之人俾知教爲正本化爲治基異時文化大興人材輩出楊尹之力也或者謂非政所急反

致請張傳曰君子之所爲衆人固不識也沂適繼其後知公之意在此故書之爲來政者之監云

展修文廟學宮記

邑人 郝良臣

嘉靖壬戌懷進士湛泉蕭公受命來尹茲土居二載政始成乃謀修學宮因謁廟集諸儒於講堂命之曰凡廟學之在天下恒必擇靈區奧壤又多規制宏深者非以侈觀望也蓋廟以奉祭祀學以育賢才譬之於人必正衣冠尊瞻視然後可以弭人之媒慢起人之敬畏今廟學雖設然起於陌巷區位湫隘垣墉短淺甚不足以展受侑鳴教鐸發舒多士之氣也吾將爲子闢新之何如衆喜曰諾適學田歲有得乃市材先事廟工買民舍改街衢縱展十丈有奇橫展皆稱又選鄉民之良實者曰王斌郝其保郭宏恩趙朝以董課之功未豐湛泉以年滿陞秩去是歲冬適大梁進士節齋李公來繼之洩政初即興舉百廢尤先注意廟學且詢知前功所以遂止者由費不足卽先捐俸金若干兩又倡寮友及學官諸生邑士大夫闔境義民各相輪助時應者如響不旬日得三百餘金乃分布衆設計日程工修正殿五楹併修東西廡內外門廟街左右兩坊及啟聖名宦鄉賢諸祠宇共計五十餘楹又置泮橋一座皆飭以蒼翠複院繚垣枚枚實實視昔之戶不蔽影大相雲泥乃遂移築學宮縱展橫展之度皆與廟長廣相埒其門堂序塾亦無不中矩矱者歲丁卯爲隆慶改元始竣事於是節齋公暨二三寮佐及學師來徵文予不文顧所言公則當公言之何可以不文默也惟國家以武定天下而以文守之故兩京有監郡縣有學至於窮荒絕域皆知尊崇孔子之道赫赫濯濯亘古所未有也故常於守令考最陟明必以興教育材爲第一蓋文事興則六

事舉矣詩曰愷悌君子令德來教言有文事也今食人之祿而荷人之爵能以文事爲首事者幾人哉自我公踵成蕭公之美如璧照珠聯焜燿先後不將愧凡令之繆曠者耶夫有開必先者二公之烈也希之則是者吾人之責也他日多士出而有爲必尊主庇民事功赫奕斯有光展修之役矣是爲記

城隍廟碑記

郝良臣

城隍廟之設自我朝郡縣區夏卽各建祠宇以叙列百神制也予邑之有廟與營作之次第則有前人載記詳矣顧其制尙多簡陋未足以展祀妥神其後稍稍增葺漸備如後寢如兩廡如前之作樂樓如旁之神厨道院之類作者非一人成者非一時於是前殿之捲棚與亭與坊則猶闕如也今年春鄰廟鄉民王斌等切念之乃僉謀虔告於神而事事焉各捐貲以爲木甃瓦石之資邑人應者如響於是五材畢集百工協奮審曲面勢計日成之建捲棚三楹不施牆隤噲噲焉略如今官府之疊室東西碑亭二坐則稍設於棚之制以坳麗阼階牌坊二楹則內準門之大小外量衢之廣狹而施等焉飾以丹黝崇以陶甃赫赫濯濯秩然備矣起嘉靖乙卯二月十七日止六月二十九日凡十有三旬乃襄其事王斌等走使南京徵予文紀諸石郝氏良臣曰神依人而血食人依神以怙骨隱顯相維合一無二者也故儻在祀籍纔可屈指大而經帶具瞻則河海岳瀆焉散而正名民財則山林川澤焉而百貨所生則邱陵墳衍焉蓋莫不蒐之禮典國祀祀之以社以方隨時饗之豈直有所私徼哉誠心之不可已也況城隍朝廷勅命之神與牧令陰陽表裏者也司彰善癉惡之柄有禦災捍患之功禦捍以濟變仁也彰癉以行權義也仁以經之義

以緯之仁義不忘民之主矣人之竭誠翼戴不約而同夫豈其心之不可以已歟然則王斌之與闔邑等畢力殫財增拓其所未備者顧非義起也乎是爲記

重修城隍廟兩廊碑

郝良臣

城隍廟殿代有繼修兩廊則歲久頽敝近年尤甚鄉人王斌郝奇竇楊天祥等不替初心力圖全美乃先捐已貲爲倡道士栗太坤復募諸邑人財既集將事事適某氏子市木百枝皆疎直堪用於是督率工徒以畚以築以繩以削簷阿是經棟宇是飾功將半而財匱太坤湫然歎曰安所得物以完斯役乎明日斲土獲銀器十三件重七十餘兩器字所造實唐之至德年所遺也衆禱於神再市物補所未逮由是建東西廊各十楹中三楹各稍崇祀六曹祿命諸神像墉宇相稱起於嘉靖癸亥三月成於甲子八月夫禮有不得而殺事有不得而廢譬之官府焉堂奧尊矣瞻視具矣而廡舍未備吏無寧宇主官者獨安乎繇是觀之則廊序不可無亦猶吏之不可闕也大小相維體統自備況惟先蔽志詢謀僉同鬼神其依地不愛寶孰謂諸鳩首者徒災木石爾耶神之顯赫固不係於祠之有無獨吾人嚮往之不足者非祠無以致敬今諸君建是功隆必不可殺之禮興必不可廢之事而致吾人嚮往之所不足斯其所以可記也

重修大成殿記

崇正六年

朱萬壽

襄垣之有儒學至元二年刱建其後遞修遞敝遞修不能悉記我朝成化十四年始一鼎新之隆慶元年再一展修之實實枚枚甲於他邑而人文蔚起者較他邑亦獨盛焉嗣是萬曆辛丑以後廟庭日圯

或阻於勞費之過多或諉於時日之有待未有望宮牆而愾然者而科第之寥落亦適與之相符識者憂之壺關令尹楊公分治襄邑學博胡公首上修理之狀於公公曰是吾志也因即借公以竟其事胡公曰此非一石一木之能辦一手一足之能勝也其命工師以求大木鳩財用以給供億勤省試以警惰窳則君爲政若乃進諸弟子員而諭以樂助率諸父老敬事者而簡之董役搜諸頽靡缺陷者而封之固之予小子其何敢辭是役也始事於天啟元年七月落成於次年五月廟貌於是乎改觀矣地靈人傑之說又當在今日乎無何楊以謝事去壺關胡亦尋以憂歸遂未有記越十年而諸生李通等偕鄉耆崔巖等始問記於余余曰嘻人情不美傳舍其官也况屬代庖胡不自寬若楊公者可以風矣苜蓿齋頭束修以上數仞之牆誰爲仰望若胡公者可以風矣人挺其秀地濬其英慈父嚴師共翼厥成若二公者更可以風矣是爲記楊公名學程漢中府人胡公名守正同州人俱舉孝廉

鄭公重修文廟記

邑人 賈待旌

嘗聞國家建學立師作養人材以供一代之用罔不追本崇源遵奉

先師洪其廟宇順時裡祀竭誠展敬以隆崇報匪一方爲然都會郡邑莫不皆然吾襄自成周以來一爲都兩作郡其間英賢輩出銘旂常而垂竹帛者代不乏人號文獻之藪焉所建 文廟高敞深邃獨甲他邑鄉先達記之詳矣自兵燹而後人文不振以致宮牆傾圮兩廡頽毀爲行人便徑行道咨嗟者匪朝伊夕矣庠師姚君爰集諸士謀修葺雖樂施之心人人胥同如工巨力微何及聞鄭邑侯來尹是邑謁廟

惻然謂姚君曰學宮如此奚以涵育人才乎姚君曰前雖力募簿勸諸生捐施惜力不從心耳鄭邑侯曰吾事也其將誰諉隨召諸生郝一鵬等義官劉瑤等出路費餘銀百金鳩工庀材刻日興工有撓之者謂歲君未利宜待也鄭邑侯曰安有修

至聖廟而待歲吉者乎或又謂物力未集宜備也鄭邑侯曰事在勉強而已於是獨斷獨裁不以人言沮未幾而學諭王君赴任晤鄭邑侯見其風力精爽詞氣卓犖喜溢於色曰吾事濟矣夫復何憂修建之事悉以委之王君曰印夙心也敢不唯命至學相其基址審其形勢終日立丹墀區畫指示凡諸生有才幹者俾其各司一事鄉耆有名數者令其分監一工鄭邑侯復時時親臨稽其勤惰盡力督率諸物取給不厭煩焉姚君亦常常勉力諸生不辭其瘁蓋三人同心一德勞苦而功多固有不約而同者矣夫以工程之大也用物之多也供役之煩也悉仰給本縣之所發繼之以庠師紳士義官之蠲施與百姓無擾焉越期年而工竣何成功若是之速哉蓋以鄭邑侯爲之宰二庠師爲之輔也正殿十楹兩廡各二十六楹兩角門各一間櫺星門一座計三間街南木影壁一座東西坊各一座名宦鄉賢各三間宮牆十數堵煥然聿新赫然改觀棟宇輝煌克符大壯之象翬飛絢爛適合小雅之章疇不歌頌而樂其成吟咏而神其功哉且是役也當饑饉之餘木植貨之於山磚瓦賁之於陶匠役給之以錢人工覓之於市所謂以工救荒用力代賑尤見鄭邑侯用心微而收效大也既而奉聖天子之明旨徧修天下文廟而吾邑已告成功矣所以鄭邑侯蒙伊按臺特加優獎王庠師亦首登薦劄誰謂宣父無靈與鄭邑侯諱僑字伯潤閩中金

蒲人王君諱印號嗣昌遼州人姚君諱逢可號奇所徐溝人工興於順治十三年九月十二日落成於十四年九月一日求記始末敢以不文辭爰爲之記

改建崇聖祠碑記

邑人 劉宸宸

學之有啓聖祠由來舊矣茲特命改建崇聖祠祀

先師五代祖考於其中甚曠典也凡博士弟子員疇弗歡欣踴躍樂勸盛事奈邇來歲歉逡巡未舉癸卯秋錫恆李公膺簡命來尹襄邑謁廟之初廣文趙思植馮殿魁兩先生卽以斯役請公力任弗辭慨然捐俸金百兩先生同爲協助而學中諸生亦願奔走趨事遂於甲辰六月興工焉功未及半趙陞去馮亦致仕歸是歲冬珊玉李先生司鐸乙巳夏閻先生謀司訓目擊斯舉卽力董其事越兩歲而祠宇落成夫李公甫下車卽加意學校留心建置仰副我皇上尊師重道之至意而四先生亦後先贊成之斯可見明良都俞之盛而文風丕變文教聿新從可知矣今述其事之顛末列諸堅珉用垂永久俾千萬世後祀先師之祖功宗德於勿替者亦卽佩公與四先生之功德於勿替云是爲記

重修廟學記

邑人 賈慎行

國家崇文重道尊禮先師爲教化人材所由盛順時禋祀共得展厥精誠洵煌煌鉅典矣顧創建歷有年所宮牆傾圯廟貌蕭然不足以肅觀瞻展妥侑因其基而重新之則守土者之責也乾隆丙戌夏五余來尹襄邑視事日謁廟見簷椽朽腐屋瓦傾殘先賢木主多露處風雨中隨攷之邑乘順治丁酉嘗重修大

成殿復重修於康熙之壬辰何頽廢之至於此極也思所以修葺之閱數月偕同官商之紳士余捐俸倡成欣然樂助未幾輸有成數擇紳士之老成者董其事置收管所俾司出入凡鳩工庀材悉從民價於是刻日興工葺大成殿五楹戟門三楹泮橋外重建櫺星門三楹門外牌坊三座環以牆垣其兩廡舊制卑隘特高大改建各十三楹名官鄉賢兩祠曩在戟門左右皆南嚮體制未協且久圯移建於泮橋兩旁之隙地東西相嚮各三楹此重修廟貌之規模也學署亦殘圯甚復以所餘者重葺明倫堂五楹敬一亭三楹西號房八楹重建修業齋三楹大門三楹二門三楹照牆一座以及尊經閣兩齋署均予整治閱四載告竣巍峨輝煌經營盡善微紳士之力不及此落成日紳士問記於余余深嘉紳士之成此盛舉也而亦樂爲之記聞之士先器識而後文藝襄邑僻處行山習俗儉樸有唐魏之遺而文風亦樸而不華無輕儇氣達茲盛世文教覃敷諸生身列黌宮仰廟貌之巍峨果能敦其德行道誼爭自濯磨以相與有成當有無愧於邑之前賢者余將有厚望焉是爲記

重修東西廡記

邑侯 卓熙泰

道光癸卯冬余蒞襄邑恭謁

聖廟見兩廡傾頽 先賢木主露處風日中擬卽舉修而沍寒未便興作今年春適府憲貢院札令勸捐擇紳士襄其事因卽以兩廡之工諭并捐款而三分其一余亦捐廉倡率復諭廩生等捐益之迺擇日興工俾紳士經理越三月而告竣重葺東西廡上下耳房并戟門名宦鄉賢二祠共四十四間約費四百餘

縉樂輸姓氏未可裡沒爲之鐫誌其起末使後有所攷焉

重修媧皇宮碑記

張力卓

冊府元龜載庖犧氏沒女媧氏立爲女皇亦風姓遵庖犧制度其詳不可得聞墓在今趙城縣東八里朝廷有大慶典遣官告祭非民間所得祀也而明德坊社廟奉焉相沿固已久矣社有生息錢文借欠訐訟愿者還刁者抗追償僅七百五十餘千因殿宇敝漏撤而新之儘數用去夫靡爭則氣和無欲則心淨太古之風如是而已可弗勉哉

重修廣濟庵碑記

李華炳

西營鎮位於襄之北離鎮數里有村落曰轆軸窪舊有廣濟庵初始莫考洎乾隆道光間一再修葺並建關帝廟佛菩薩殿土地祠數楹及社房一所迄今七十餘年矣上雨旁風日穿星漏社房院且坍塌無存有舉莫廢之謂何而坐視前人之功德墮廢于荒煙蔓草之中其何以妥神靈而將祀典耶歲辛亥村人王君城與同族王鑫王鴻儒王惠秀等集社人而爲續修之舉朽者易之舊者新之塌毀者改建之計糜錢一千緡有奇而不數月間美哉輪美哉奐翬飛鳥革視昔有加焉適余自都歸里王君以碑爲請余聞諸隣右言此庵屢修均王氏之力爲多而首事之人則爲王君本支之遠祖今王君繼承先志修廢舉闕其赴義濟美有足多者方今歐風東漸百度維新好事者至欲取信神道尊家族之習慣破壞而掃除之不知神道設教載於易尊祖敬宗詳於禮古聖昔賢傳之數千年而不廢者非惑於幽而囿於近誠欲以正人心而聯團體也若一切破除將禍福之說不足爲懲族姓之繁無以維繫新知識未進舊道德日頽彼蚩蚩者氓亦何所忌憚芸芸之衆更何以固結哉王君崇信神道承先志而聯族誼此固仁人君子之用心而道所賴以維持者也濡毫記此蓋欣幸深之而又不禁感慨係之矣

泰山廟重修碑記

王鳳儀

縣治之西三十里有鎮曰夏店大邑也亦仁里也其東偏有泰山廟焉代遠年湮日就傾圮丁酉春募化重修擴其基址以大其規模聖殿移建於後者約八尺許歷夏徂冬工始告竣自碧霞元君以及降生祠牛馬王廟樂樓廂房無不煥然改觀西南隅又增置地基創建房院一所統計所費不下二千餘緡其素積些須未有也皆四方君子以迄本鎮善信所樂輸焉雖亦勸捐者之力與而要非神靈之所感不至此戊戌小春將立石首事者囑余爲之記余因之有感矣碧霞元君者何上古天子女媧氏也與太皞氏同風信三墳書鄧氏姓書皆云然上古有三皇或曰伏羲祝融神農或曰慮戲燧人神農而春秋運斗樞記則又曰伏羲女媧神農是媧皇者三皇之一也說者以爲婦人女子或以爲庖犧之妹或以爲帝嚳之女豈上古之世亦有若漢之呂唐之武稱爲女天子者乎或未必然也然則稱聖母稱女媧者何書曰元后作民父母傳曰子產衆人之母釋名云女者如也女口爲如媧者孩提之名維皇保民如保赤子雖呱呱而泣者亦使之各如其願以是而曰聖母又曰女媧然乎不然乎稱皇者何風俗通云皇者中也含宏履中建中立極也白虎通云皇者煌煌人莫違也煩一夫擾一士以勞天下不爲皇也許氏說父云皇之爲

言煌煌民無得而名也然則千百世前且無得而名之千百世後又焉得而名之或曰煉石補天斷鰲立極噴噴人口矣何不以斯名之余曰斯言也列子之隱言也夫陰陽失序三辰盈縮是即天地之闕不必以形體虧殘也煉五常之精以和陰陽使晷度順序不必以器質相補也信如子言天積氣耳豈可以石補之乎斷鰲之說類此矣與其以名名之曷若以不名名之猶不失皇之爲皇也哉是爲記

重修甘澤王廟碑記

連士毅

嘗考籥章掌土鼓豳籥祈年則歛豳雅擊土鼓以樂田峻祭蜡則歛豳頌擊土鼓以息老物凡所以爲民事設者何詳且備迄今楚茨諸詩不復作矣而早則雩札則有禳縣鄙村落間祠廟相望知春秋祭酺之習猶是周宮之遺意焉耳吾鄉白雲山巔舊有甘澤王神殿稽前碣知此地爲神顯靈之區是以鄉人春祈秋報悉於此間拜禱焉奈自前人重修後至今歷有年所風雨剝蝕不獨正殿摧殘廊房樂樓俱就傾圮院外龍天土地祠亦頗殘缺洵非所以妥神靈肅瞻仰也道光丁未夏張君榮光虎榜邀兩村父老商議修葺因所費不貲暫停享賽積貲以給工費父老是之遂筮吉戊申三月鳩工庀材廢者易之缺者補之聖殿神祠及樂樓對庭配房厨室悉落地重起暨茨之餘飾以金碧託始於道光戊申落成於咸豐戊午約費大錢二千餘緡其不敷之貲復募諸外境自是鄉人祭享始稱便焉既而屬記於余余謂是舉也便一鄉歲時之祭耳抑思浩大之舉閱十載而始竣非諸君一念之誠何以能此本此誠而進格乎神明將水旱之災化於不形疫厲之禮消於烏有亦何俟趨踰於壇墀之際而雩且禳爲耶行見仁讓之風

成於富庶禮樂之化起於農桑是以君子觀於鄉而知王道之易易也是爲記

三聖神閣建修告成序

張考功

西河底村即其地之東南新起關聖帝君閣三楹左文昌右白衣共五楹坐巽向乾地勢名勝巍乎煥乎誠一方之偉觀也按其地西北曲來甘水東南直接襄城韓山崎乎側漳流遠乎東古人云襄非尋常邑也豈不信哉載諸史冊誌諸邑乘哲人名宦相續不絕蓋不獨西河之遺風未泯忠臣之烈節永傳也今是閣旣成神像之金碧殿宇之輝煌目不必言而神明尊矣地脉聚矣士民莫不蒙其福矣然士民之福固不自今始也風俗仁厚輕財尚義何謀不成何事不舉乎誠堪爲鄰村所效法也鄉衆求予言以爲記予重愛鄉人其皆知慕義也是爲序

重修甘澤王廟記

孫安樂

縣西北二里許有村曰西河底玉山拱翠甘水環清瑞氣朝浮風景絕佳於村西少北之際見夫蔚然深秀高聳矗立與山光水色互相輝映者則

甘澤王廟在焉粵稽史冊王下蔡人系出名門以幼稚之年出世秦相奇計一出而聲鎮寰區若勸張唐之相燕使趙國之郊迎廣何間之地襲秦爵之封功垂當時名稱後世宜其千載而下景仰英風而崇奉莫忘也况夫緣岸而北清流漱石激湍瀦洄有泉出焉古傳之謂甘泉也每逢天時亢旱禱雨輒應一方人民受賜良多故鄉人歲時享祀敬答神庥惟斯廟歷年久遠初建無稽有明天順年間村人苗欽獨

捐已資建修一次降及前清續修者至再迄今年久失修廟貌頽殘雖名勝天然因亦爲之減色經其地者每嘆山水猶是景物全非不勝昔盛今衰之感於此而不重爲補葺不特無以紹前功又將何以妥神靈因而集衆公議擇吉興工開始於宣統元年落成於民國四年計修正殿三間後殿兩楹東殿藥王西殿文公各一宇東西廊房六間樂樓三間併砌建上院東西房十間樂樓東西耳樓各三間廠棚四間以及香亭月臺各廟祠宇莫不殘修缺補咸與維新將見翬飛鳥革輪奐增輝勝地佳境頓復前觀瞻覽之下宛現紫電青霜與金波玉浪掩映爭妍其清幽之氣掃盡萬丈紅塵特斯舉工繁費鉅共需錢二千一百餘緡攤之本社者十之六七募之四方者十之四三茲將擇日鐫碑用誌不朽村人苗君悖然與余爲忘年交君以友契囑余作記余不文義難辭爰不揣謏陋謹叙該王之履歷略誌斯廟之因革勒之貞石昭示來茲俾後之祖今亦猶今之視昔庶斯廟之歷久不替神恩之庇蔭無窮矣是爲記

重修古佛廟碑記

連篤敬

竊以詩詳作廟之文禮載祀神之典餼羊告朔尼聖猶存爲壇同墀元公不廢自來營造之事必先宗廟而後宮室者凡以昭肅敬格神明也而不知卽爲後之立廟祀者所由起邑西莊頭村舊有古佛神廟一座稽前碣爲康熙時所建復修於雍成兩朝夫亦重祀典之意耳已亥春鄉人憫廟貌頽殘欲稍葺而興之乃停賽徵資筮吉興工廢者興缺者補除正殿廊房修造外復建樂樓九間新增東院社房馬棚念四間墜茨之餘以金碧飾之殿內佛像亦概行粧塑越五載而告成約費制錢一千六百千有奇旣而囑記

重修昭惠靈顯王廟記

路之達

蓋閩神者百物之精也凡恩澤加民勳勞定國河海岳瀆山川谷形之風雨見之怪物其不可以意度者皆謂神皆足動人儼若之思而用祭將敬苟誠敬可採雖罇酒用缶不可謂之非祀典也吾襄靖朔門內有二郎廟創建無稽考神之所自蓋隋煬帝時人姓趙諱昱從道士李珣隱青城山帝知其賢起爲嘉州太守適冷源二河老蛟溢水爲民害神持刃入水斬蛟而出民患乃沒時有佐神入水者卽今旁七聖是也隋末世亂棄官隱去不知所終後水復漲溢人見神立青霧中因感德以祀之唐太宗封爲神舅大將軍明皇加封赤成王宋眞宗封清源妙道眞君元封昭惠靈顯王迄今千有餘載廟不乏祀而吾鄉之糾首一十八人亦同心協力先將廟內之正殿樂亭揭瓦次修捲棚三楹以及正殿之捲棚前之作樂樓各各粧飾今棟宇椽題煥然一新無者創之舊者新之視昔之區位簡陋已大相雲泥庶神得所依而人蒙其福并足以妥神靈而展祀典耶工起于二月吉日落成於六月二十六日因略記之以告後之誠心祀神者

重修麻衣洞記

孫安慶

縣西寶峯後舊有麻衣洞在焉顏其額曰鐵瓦廟或有問予曰麻衣者何曰祖師之法號也因其所著之袈娑以麻爲之也洞者何祖師歸化之時霹靂一聲能出雲氣而爲風雨者也鐵瓦者何取其後人重修廟如鐵石歷久而不壞也不然特一鐵瓦耳詎能永覆神像哉閱縣乘麻衣祖師後周時僧雲遊至襄募建寶峯寺而臥化焉善相人能爲風雨所謂生前有道術身後而爲神物者也禮曰山林川谷邱陵能出雲爲風雨皆曰神又曰凡有功烈於民者悉在祀典况麻衣洞爲我三村境內之地其山秀其谷深其林密其神效其爲風則和爲雨則甘乎雖列諸祀典也亦宜故重修者不一而足相繼者爭先恐後今春然泰僧聯三村糾首重修斯廟或鳩工或庀材或繪事或捐之三村或募諸四方資費不下數百金而膏月而已有成也亦可相見其好善踴躍之心矣傳曰人之欲善誰不如我噫後之人嗣而葺之則斯廟之不朽不獨謂之鐵瓦也雖謂之鐵廟也亦無不可廟成問序於余余質爲數言爰爲誌其緣起云

重修昭澤王行宮碑記

路煥紋

靈感康惠昭澤王古韓之龍神也龍能致雨神司龍禱雨輒應縣有廟舊歷七月初五日聖誕之期爲全邑之大會香烟極盛各村之祀神者亦衆縣東北百數十里黎武交界之地有洞曰將軍洞亦曰龍洞禱雨者常至洞取水洞旁相傳有廟年久失修遺址無聞縣令陳公於清同治六年捐廉七百五十緡襄地募捐共二千八百餘緡於洞口西百餘武建修行宮起造正殿三間耳房各二間左右配以房廈門牆俱

全又購到本邑大黃庄村地四十三畝餘錢百緡出放當局一分五厘生息一切收益作爲納賦守廟之需籌畫極爲完善迄今又四十餘年矣風雨摧殘廟宇傾欹不有補葺何以安聖正擬提倡適有武邑魏君培棠黎邑楊君暄來襄議工余素仰王威及同邑人郝君映衡集商募捐與楊魏兩君議將正殿改作石窟以垂永久餘仍舊貫工竣書其事勒石於襄城之龍神廟余又有說者查舊縣志稱王失其名封爵與余聞亦有異者王諱方焦其姓降生於唐顯化間韓州合章招賢坊人也年十五精陰陽術復遇太乙真人授以神符其後措施無不如意乾寧間縣令苗珂立廟祀之號土地將軍襄邑立祠自此始墓在襄邑之南曰將軍墓宋崇寧二年勅賜靈濟廟爲額因禱雨靈應故也大觀四年封甘澤侯宣和年封昭澤公金進爵爲王明洪武封海瀆焦龍神旋改封爲龍洞神至清同治二年縣令陳公又請加封以彰王德勅加康惠神功浩蕩傳聞異詞因輸管窺藉資考古云爾並附大觀勅語以便考證

大觀四年正月封甘澤侯勅曰朕旌功德不問幽明利澤旣豐褒崇敢後隆德府襄垣縣靈濟廟廟食茲土陰施爲多時乃雨暘民所庇賴肆頒顯號錫以侯封歆昨茂恩永爲民福可特封甘澤侯

重修城隍廟碑記

王維新

神道設教古聖人利用羣衆心理之弱點而示以降祥降殃之所自俾人人存克己之心維持社會安寧於久遠其潛移默化之功運有超出乎形驅勢迫之所至縣之城隍較諸神而尤顯著者也其廟宇之輝煌體制之嚴肅誠有助乎城隍之靈而使人多生敬畏之心即處深山曠野亦覺鬼神隨其後而森然可

怖天理良心不爲人慾所制時發現於事理之至當其關係詎不重哉襄垣城隍廟宇規模廣大固無俟乎擴充而代遠年湮風雨摧殘罅漏者有之殘缺者有之神色廟彩尤一望而莫知境界縣長魯公來守我邦參謁斯廟心焉感動先籌微款新添儀仗等物邀糾首趙謙吉商同六班糾首設法重修六班糾首等早有是心工程浩大未敢冒舉既承縣長之囑共奮成城之志立簿募緣刻日興工其正殿寢宮廊廡樓亭牌坊社庭馬棚圍牆照壁廟外之觀音堂行神井神各廟暨內外一切神像數月而燦然大備煥然聿新是役也開始於民國十二年春告竣於是年秋季之月於夏歷十月初一日開展神光前後共費錢二千串有奇悉募化於民間城隍之威靈更藉茲而益著豈徒廟宇輝煌克壯瞻觀而已哉謹爲記

重修漢孝文帝廟碑記

連篤敬

邑西二十里許有山曰禁牛山不甚高望可百里上植松柏多株昔人慮牛羊之踐傷也而約法禁之故曰禁牛山或曰金牛山謂山中有牛如金伏而不出且居縣屬之中央土色黃故以金牛名二說未知孰是要其巍然聳峙俯視諸峯固一方之勝地也余家於山北常陟其巔徘徊瞻眺東望桃林仙堂諸山出沒隱見庶幾有隱君子乎南爲鹿臺五嶺居潞澤要衝西向獅山紫巖古銅鞮伯華之遺風猶有存者北接小虎邱山漸高遠踰武和可達平定以屏蔽幽燕惟茲山環繞于衆山之中嶄然露頭角若伏若現晨光晚照仿佛如神牛之騰躍於太空古之達者建廟於北峯之首意其深歟癸亥秋鄉人修廟畢囑記於余余曰斯廟一新蓋維新之機括也廟奉漢孝文帝帝自北藩入承漢統其是否臨幸茲山不可稽據

漢史所載薄賦輕刑勸農養老諸詔語爲三代以後所僅見廟食百世理固宜矣禮云有功德於民者則祀之帝之功德在漢世爲特著余鄉俗尚樸素重節儉而黜浮華安知非帝之靈爽有以默相之於數千百年後耶不然何廟祀而尸祝之春祈秋報獨余鄉之祀帝惟謹耶廟舊宏廠年久漫漶合社六村人等慮無以妥神靈也葺而新之計正殿三大間左右香房各二間樂樓七間東西社房各八間一概揭瓦重修并粧塑神像彩畫殿宇與廟街之圍牆寗院馬棚等凡係舊有齊修外新建廠棚三間益形擴展需時四年費錢二千餘緡其功之成半由人力然非有帝力佑詎能如是之易耶方今民治演進村政勃興地方要務皆待整理尤望我鄉人本刷新廟貌之精神謀社會之改進士勤于讀農勤于耕工勤于製造商勤于經營以迄蠶桑牧畜保衛各事與民生日用之應行改良者一新而無不新之俾此方文明于焉大啟則山川亦爲之生色而斯廟之修爲不虛矣天人之理有感斯通神其更有以默相之乎是爲記

重修關岳廟碑序

古之所謂忠者有忠君忠國忠友忠于職務之分民國肇造君已不存獨忠之一字爲人禮教精華之所寄篤學深思之士怒焉優之以爲君可廢而忠不可廢也於是欲以教忠爲人心風俗之大防吾襄官商重修關岳廟其殆出于教忠之一念乎共和十有四載民權日張然叛國自私賣友求榮以及玩愒職務者較之君權時代爲衆但一人關岳廟雖殊俗無良之人其忠心未有不油然而生者何也關忠于漢而絕魏岳忠于宋而討金是忠于國也岳受宗留守之知關感劉昭烈之遇殺身成仁是忠友也關伐吳岳

伐金皆不得志而死之是忠于職務也高風亮節實足爲人倫之表生而正直死而明神人之可也神之亦可也况乎斯廟創于明嘉靖以前後人有保存古蹟之責豈可任其摧毀乎且北廟地最適中襄人于崇拜英雄之餘仍以爲討論公益之地其樂樓則備演通俗教育之新劇也其局棚則陳列古今物品資考究也其後院配房則商會辦公市民公議之所也其院東隙地雜糧糶糶市集收之處也正殿合祀關岳遵政令且教忠也抑有進者岳之合祀始于民國四年三月而關像則造於有清之前願吾襄人此後以關夫子岳夫子稱以期無負于先後魯許兩縣長及商會諸君子教忠之心重修之美至于稱王稱帝皆出於專制時代之追封不特民主國民不宜附和且亦非兩夫子立德之本願芳寄跡燕塵十有餘年矣重以父老兄弟之命披瀝一言以當實錄關岳在天之靈其亦莞爾而許爲知言乎衆議院議員襄垣李慶芳記于京西楓橋別墅

民國甲子歲續修文廟記

聖人之心天心也亦人人之心也人人重己而輕人不知利人正所以利己之道惟聖人得天獨厚無偏倚之心無忌嫉之心無尊已卑人之心使人人之心皆如聖人之心則大同之世可以無爲而致顧人人處世接物之界限不明其偏倚之心忌嫉之心尊已卑人之心因時因事同臻並集是以愈求利己而已愈不利也夫人生地球之上各有天然獨立之地位如各本其固天性盡其固有之天職爾爲爾我爲我則侵爭何由而起聖人考古從今深悲憫夫人心之不天周遜列國之餘振木鐸以垂教萬世示人以處

世接物之道曰中大賢繹之曰忠于恕曰絜雉皆所以去侵爭之原而造大同之因正人人處世接物須臾不可離之天道也歲甲子縣長魯公集欸刷新文廟以崇聖人之祀而壯衆人之觀既立石矣達天德門外階欄等處木工未竣而欸已罄邑人連篤敬等募欸續修工竣而並煊其事冀閑聖人之道遏人侵爭之機遂于十四年夏歷九月二十二日等日獻戲三朝大放烟火並開提燈大會以兆文明之象復由師範高等兩校學生化粧講演示人人以入聖之途以副平等之旨洵盛舉也事畢餘錢百綿公議發商生息補助聖事屬維新記其事謹沐手以序

重修大悲堂碑記 大黃庄村

苗雨潤

古聖人以神道設教與歐西之唯神說大同而小異近代科學家主張唯物論謂宇宙萬有一切皆爲物質所構成而唯神之說每每視爲荒誕不經之談歐風東漸以來時有將廟宇改爲學校之舉殊不知唯物論極盛之歐西教堂林立猶假宗教之信仰以維繫人心我國當新舊過渡時代若將古聖人神道設教之遺意完全絕滅而無存其弊豈可勝言哉村中舊有千手菩薩廟名爲大悲堂創自何時建自何人雖無碑記可考是亦爲神道設教之遺意夫苦者覺也薩者性也言其能自覺其性度己以度人也千手者言其手之多足以普救衆生也民國以還爭權奪利擾攘無已倘能體菩薩之心而存救人之想此風或可稍戢甲子秋余任北京參議院議員假歸居鄰斯廟目覩其屋漏像頽漸就傾圮因思集資重修捐銀洋壹百伍拾圓以爲之倡商之王君聲甫王君亦慨捐洋叁拾圓又商之村人村人亦皆樂捐以

助其成即於乙丑春鳩工庀材不數月而廟宇整潔聖像輝煌有睹斯廟者參菩薩之像而想 菩薩之爲人庶有以去其利己之心啓發其愛羣之念並於西配殿恭塑呂祖純陽像俾向道者有所觀感是亦體聖人神道設教之遺意也因將重修始末及捐資之芳名勒石以垂永久

橋梁

永惠橋在北門外跨甘水之上金天會間建明成化間知縣張曉重修

市橋在韓州故城舊先天觀後世傳豫讓欲刺趙襄子處即八景中市橋

南營橋在磁窯頭村之北世傳石勒屯兵時建

通濟橋在縣城南門外成化間致仕縣丞邑人王均慶創建清初知縣佟學詩重修

雙龍橋在上王村東爲東西通衢雍正時間知縣劉德潤建

義濟橋在西城庄明嘉靖間鄉耆楊涇川等創建

圮橋在下峪村西其下二水合流世傳即張良進履處

雙橋在橋頭村北二橋相距數武

濟衆橋在果則溝乾隆二十五年介賓崔起璇等創建

夏店橋在夏店鎮西成化間知縣張曉建

鐵梁橋在大平村西下有鐵梁三枝故名

臨漳橋在虜亭鎮東舊名周家橋乾隆三十三年知事賈慎行重修

虜亭橋在縣西六十里虜亭鎮

王橋在縣南十里舊有石橋跨於漳水上後爲水衝毀今遇冬月沍寒搭木橋以濟之知縣王國治等捐

穀百石每年營利穀三十石作修橋費原庄上王二里里長輪流經管有碑記

東北陽橋在縣東門外乾隆三十七年知縣賈慎行捐建木橋俱用橫板建橋房一座在南返頭村三元

宮右

永利橋在夏店鎮西北地當孔道污下難行道光四年知縣張公率士民創建石橋往來行旅無不稱便

立有碑記

元城橋在輕城口同治二年監生張天元等募化重修

東王橋橋係往來通衢日久廢墜不甚堅固同治六年知縣陳宗海捐置堅厚木板五十餘間橫搭橋梁

寬而且穩車馬重載來往便之又建橋房五間以備拆橋後收存木板上王原庄兩里輪流經理

永惠橋在縣城北門外橋西北土堤當甘水之衝日久冲刷頽敝坍塌漸及於橋光緒二年貢生王士吉

等稟請募化修葺下石砌上磚磬十餘丈堤重修完固

西圍橋在縣治西南四十里石泉村東康熙四十六年知縣袁良創建有碑記

永濟橋在縣治西南三十里夏店鎮西乾隆五十四年建修有碑記

太平橋在縣北石河村清順治五年創建邑人路之泰作有碑記

新民橋在暖泉口民國九年趙宋之督修工成後又集基本金三百千文發商生息作爲後日修橋之用

碑文 見後

普濟橋在縣北南娥韓村兩界之間爲南北交通要路舊以土築宣統年間因水冲壞邑人栗剛倡首募捐又用石砌共高四丈中填以土寬坦堅固可行仍着南娥韓村兩社經理

大南溝石橋在南里信村同治間王橋李信兩村並修之長五丈寬二丈堅固耐久立有王槐堂所撰之碑文

永濟橋在夏店鎮西光緒二十二年重修

山斗橋在縣北二十里北郝村

北營橋在縣北四十五里西營村南

禱雨橋在縣北二十五里橋煙村南

永安橋在縣西南三十里之橋上村原係大石橋兩座年遠屢塌屢修勢成橋上之橋清末時王君萬琦募款補修一次有碑可考

官道溝路橋碑

黎城進士靳榮藩

余弱冠時訪友韓州取道西營下良經所謂官道溝者川原曠遠徑路坦平以爲國家承平百有餘年無

襄垣縣志

卷之六 營建考

五十

偏無陂無反無側洪範之王路小雅之周行其盛軌可以想見詢之士人乃知去險而就夷者卽水碾村趙翁修築之力也其路當遼沁之衝舊在陡脚坡峻嶺層巖微徑險巖趙翁憫之乃視地於其西得官道溝鳩工集役始於雍正五年閱三載而成則余向所經者是已乾隆二十三年其嗣太學生紹聞衣德以爲先志所在踵事增華聯同志郝楨槐根糖暨李森秀定秀等自水碾村至石峭坡凡八里其創建者曰雙泉橋修築者曰南營橋水潦雨雪行者若忘更置地若干畝爲經久續葺之費遠近慕太學生之能世其德也俱捐金粟爲助而屬余文其碑憶余往來韓州時纔二十年耳先君子值余之歸輒詢其途中之聞見交遊以爲學殖消長之驗二十一載以來余之所以克承先志者安在而太學生推廣遺緒有基勿壞誠哉作室家而勤垣墉惟其塗暨茨也是役也可以廣德可以教孝口碑載道有不藉文而顯者余觀其事蓋亦有悄然以思愾然以興者已趙翁諱鐸太學生諱思恭世濟其美因樂爲之記云

重修永濟橋碑記

李儒林

襄垣縣治西三十里許有鎮曰夏店鎮之西舊有永濟石橋一座創建不知何時其碑碣之可考者自明萬歷年間迄本朝乾隆丁未已兩移建於此矣斯橋也當東西之要道爲南北之通衢外臨漳水內接深溝是不可須臾離者莫斯橋若陡於光緒丁亥秋陰雨連綿其南一丰忽爲傾圮若不爲之重修何以利行人而通往來乎奈功大費繁毫無積蓄事難輕舉幸有李君文華李君德榜等謀及紳商先於本鎮之鹽當錢舖而借助焉復有秦家坡村楊姓耀餘者願舍其山之石而開焉於是擇日興工大爲補葺橋之

西行不數武有坡名老馬溝每當七八月間水冲成渠行人苦之又增修石水漕十餘丈自乙未興工至丙申九月告竣所費二百餘千始募諸本鎮募諸四方一時之好善者無不踴躍樂輸焉斯亦足見人同心矣諸公囑予爲序予愧不文而亦身親其事因直記其始末並施舍芳名以垂不朽云

補修永安橋碑記

連廷元

橋上村古有大石橋兩座名曰永安橋相傳已久屢經隳塌隨即補葺所以綿綿而不墜者賴有鄉君子以維持之耳迄今基址漸殘乘輿恐曳往來行人每多苦之經紳士王萬琦在潞安府竭力募捐錢若干繕督工修葺不數月而告成堅固如初余不揣固陋略叙始末勒諸貞珉以垂不朽云爾是爲記

創建新民橋記

嚴用琛

襄垣城西距虜亭六十里爲往來省垣大道蜿蜒隨漳河行中經龍鳳山寶峯寺各名勝懸崖斗壁最壯瞻觀河水漲落不時而路綫亦變更無定寶峯寺至虜亭鎮一段其變更也尤速歲丁巳用琛來守斯邦數往來其間深憫河灘水徑不利行人將須改道坡上也是年秋虜亭趙紳宋之以暖泉村橋路引向琛募捐琛詢問得詳卽佩趙紳熱心公益先我見而嘉惠行人也且趙君雖邑之紳然非公事未嘗至公署已未冬琛將去任趙君又囑琛記橋路事竊思東西各先進國對於路政特意講求以與交通有絕大關係也趙君遊日本所得學識甚夥而斧柯莫斷未能展厥經綸趙君不得志於國而試驗於地方亦牛刀割鷄之意其志豈在文明國偉人下哉是路與橋之工起于民國六年十月成于民國九年十一月路自

虜亭東坡底至馬抱泉止共長二十里許石橋建在暖泉口計二孔高一丈五尺餘寬一丈三尺餘長一十七丈餘其工程花費共一千六百餘串其款由募化而集概未攤派噫吾國紳士皆能如趙君者路政之發達詎有涯耶是爲記

補修橋路基本金記

王維新

金錢萬惡前人言之夥矣顧能澈底覺悟者少能實行輕視者尤少虜亭老嶺村郭君守成富資財樂施與於暖泉橋路之修也旣捐資以助之于橋路之集母本以備補修也又捐巨款以倡之聞風興起者絡繹共集母本金三百千文整擬以月一分行息公選經理十人出放殷實商家生息以備每年橋路應用顧郭君雖商人而得如來心法堪與弦高比美已爰將捐款芳名並勒諸石以爲世風云

勸建南邨板橋碑記

董守身

邑治之西有漳水焉出於沁州滑伏二山異派而同流下而會諸銅鞮郝郭二水經繞乎夏店鎮之西南其水雖不甚澎湃厥土惟覺塗泥每於春冬凝泮之際彼都人士視若畏途歷年來積薪而架世屬敝村之責其河西南鄰近所渡之村亦不過助其丰臂而已光緒乙巳夏有南底張姓者施捨木板二百餘尺村人爰是邀隣村之巨擘及好善諸君同爲商議將柴橋而易之以板僉曰甚善因而諸村憤力各社捐貲共積錢一百零六千此十二月之輿梁遂成而鄉人之來往稱便也然木年久而易朽宜籌善後之策故又有董君子程施捨錢文於河西南荒曠之地種樹七十餘株以備將來添補之用倘樹株未成器用

而架板漂短以及遠年添補木質花費多寡仍按原有各社均攤錢文至於每年拆橋搭橋之期理宜清切著明定于霜降前三日搭橋清明後三日拆橋屆期即舉刻不容緩此亦立憲之目的夏周之要典也是以登之碑碣屹屹以垂不朽云

展修路記

孫安樂

太平村龍鳳山前有官道一條乃爲東西之要路往來之通衢西至暖泉站東至河口界中十五里許土石相間崎嶇狹隘行旅維艱前清末季商旅寥落民國以來車馬繫增往來衝塞殊多阻礙每逢夏雨冬雪之際車轍往還尤爲嶮巇非廣爲展修不足以利行人幸有鄰邨孫安舒孫安福孫安德孫遇隆孫守慶孫守傑孫宗謀君等觸目感懷籌議展修督工開掘不數月而其工告竣寬拓十數尺錢費五百千彼阻之險茲平如砥車馬馳驅通利無礙若非諸君子之急公好義各善士之解囊樂輸俱不克以至此因贅數語略叙梗概昭示來許以資激勸

段堡村石路

段堡村南新開石路一條闊一尺八寸長足二十五丈計算修路花費錢四百千有奇於民國十二年修築

汽路

民國十五年二月奉省令建築白晉汽路一條北起魏家坡村北之石橋界南止茶棚嶺南之吳家莊界

中經廐亭夏店閻村等三十餘村路線延長八十餘里寬二丈二尺佔用民地六百九十六畝八分九釐除路身有四大木橋及八尺以上之磚石橋樑三十個係用省款包修外其六尺以下之涵洞水眼五十一個純由縣地方籌款修築計用料價總數洋一萬一千零二十五圓一角八分至汽路全身之土方及土石摻雜方二宗合計二十一萬四千六百零九方三丈用人工五十六萬五千七百七十三個則由許知事同路工處副處長栗維藩依全縣村民戶數按照路身之概號段數分派各村村民輪流出備民工分別修築需款需力不計其數惟此役之興曆時二年之久耗財在十數萬以上對於大局交通上頗形便利而民力民財耗費甚鉅亦吾襄空前未有之最大工程也特略記之另寫路線于方里圖內